

ASO TOFI, 15 IUNI 2023

Na nofoia e le Fofoga Fetalai le Nofoa i le itula e 9:35 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

Ou te faatalofa atu i tulaga aloaia i lenei taeao fou i le paia o le Palemene, i le afio o lau Afioga i le Tamaitai Palemia, afifio a outou Afioga i Minisita o le Kapeneta faapea foi a outou Afioga i Minisita Lagolago.

Afio le Taitai o le Itu Agai faapea sui usufono mamalu uma o le Palemene. Malo le soifua manuia ma le lagi e mama.

E faatalofa atu foi i le tapuaiga a Ofisa Sili o Pulega o Matagaluega ma Faalapotopotoga Tumaoti a lo tatou Malo faapea foi nisi o le mamalu o le atunuu ua mafai ona tatou auai faatasi mai i lenei taeao.

Samoa i ou tulaga faalupelupeina i lau faafofoga tapuai mai. E faatalofa atu lau Palemene.

ISI FAASILASILAGA A LE FOFOGA FETALAI

FOFOGA FETALAI: Mo le silafia e le tatou Maota, e tusa ai ma tatou Tulafono Tumau, o le aso Fono lona 3 ua faatulaga mo galuega a sui usufono taitoatasi, private members' business, e pei ona ou folasia manino i le tatou Pre-Sitting i le aso Gafua na se i mavae atu nei. Ua i ai le faamoemoe o le Fofoga Fetalai e tataua ona faatino le laasaga lea o tatou Tulafono Tumau. E manino lava tatou Tulafono Tumau, a i ai se mataupu e fia manino ai so o se sui usufono o le Palemene agai i Minisita, po o se isi sui usufono, e mafai ona faatino e ala i se fesili po o ni fesili e tauala mai i le Failautusi. Ua taoto aiaiga o le faagasologa o lona faatinoina. O avanoa e tali manino mai ai le Kapeneta i fesili a sui usufono i so o se mataupu o fia malamalama i ai. Peitai, e leai se sui usufono mamalu na tuuina mai se fesili i le Failautusi o le Fono Aoao Faitulafono e tusa ma aiaiga o Tulafono Tumau.

O le naunautaiga ia te au o le Fofoga Fetalai, ia faaoga uma avanoa ia ina ia mautinoa le manino o sui usufono uma i so o se mataupu tau i le Palemene. O avanoa o fesili ma tali a le Malo o se laasaga o lo o faataua ma o lo o faatino e Palemene o Malo o le Taupulega. E tele lona taua ma le aoga, ma

e atagia ai faiga manino lelei ma malamalama faa-Palemene. E i ai le faamoemoe o le a faaauau lona faatinoina i le Paeaiga lenei. Ui i lea, o le a faagasolo a tatou taualumaga e tusa o galuega ua faatulaga mai le Pepa o Galuega. Manuia le usugafono i lenei taeao.

Tofa Hon Lauofo Fonotoe Nuafesili Pierre Lauofo (Taitai o le Itu Agai): Lau Afioga i le Fofoga Fetalai e faanoi atu pe maua se avanoa.

FOFOGA FETALAI: Ia, e leai se avanoa e mafai ona tuuina atu i lenei taimi ona o lea ua faamanino atu e le Nofoa tatou Tulafono Tumau ma tulaga ona o lea e le o faatinoina. O le mea lea e faamalulu atu i lau Afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Ia ona e pei e foliga mai ua le usitaia e le Maota le faaaliga a lau Afioga i le aso Gafua. Ae manatua foi, ua maea le tatou Pre-Sitting ae aumai le faaaliga a lau Afioga, saunoa mai. Ia a o le 4 o le aso lava lena e tapunia ai. O lea ou te vaai atu i le Tulafono Tumau, e 2 lelei lava aso atoatoa e tataua ona faaoo mai ai le tusi.

FOFOGA FETALAI: Ia e lelei le faasao atu o lau saunoaga.

Tofa Hon Lauofo Fonotoe Nuafesili Pierre Lauofo: O le mea lea e faamalulu atu, ona o le lava o se taimi, ae mo le agai i luma, o le a faaoga isi avanoa. Faafetai.

FOFOGA FETALAI: Ia, e lelei lava le faasao atu pea o lau saunoaga. E leai, e 2 aso na tatala atu ai le avanoa. E oo mai le 4 o le afiafi o le aso Lulu e leai se mea ua oo mai, ae o le aso Gafua, aso Lua, ia o le tulaga lena. E manino lava le Nofoa. O le mea lea, o lea ua avatu le faasilasilaga mo le agai i luma, ina ia faapea ona faaoga nei avanoa taua mo le mamalu o le Palemene.

TULAFONO TAU FAAOFI O LE PEPA FAAMAONIA FAATEKONOLOSI E ILOAGOFIE AI TAGATA SAMOA 2023 – felafolafoaiga faaauau i luga o le faitauga faalua – Aso Fono Lona 2

FOFOGA FETALAI: E tolopo Tausalumaga a le Fono Aoaio Faitulafono i le aso Fono ananafi ua maea ona saunoa le sui usufono mo Vaimauga 1.

Ia o le avanoa lenei mo se tasi o sui usufono e fia saunoa. Ia, o lea ua matau atu e le Nofoa, atonu ua faamalieina sui usufono uma i le tolaulauga foi a le Minisita i lenei Tulafono, o lea ua matau atu ua leai se tasi e fia saunoa. O le mea lea lau Afioga i le Minisita, ia tulai maia.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia, lau Afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Ia ona o le manumanu lava ona o lea faatoa maea ona e saunoa e maitau atu pei ua toatamai lou finagalo i le le faaaogaina o avanoa, o lea la ua ou tulai atu o le a faaaoga le avanoa lenei.

FOFOGA FETALAI: I a ua fai si umi o faatali atu. Tulai maia, faaaoga mai.

Tofa Hon LAUOFO FONOTOE NUAFESILI PIERRE LAUOFO: Ia lau Afioga i le Minisita, faafetai i lau Afoga i le Fofoga Fetalai, ona o lea e faaaau le tatou Tulafono mai le aso ananafi. E momoli atu le faafetai i lau Afioga i le Minisita e ona le Tulafono, ona o le Tulafono lea e matau ma pei foi ona tatou talanoa i le Pre-Sitting ua leva ona tapena mai. O lea foi sa maua le faatonuga a le Afioga i le Minisita pei o lea e taoto lana saunoaga i le Maota i le fonotaga talu ai ina ia vave loa ona aumai le Tulafono i totonu o le Maota. Ia lea la ua tatou taunuu mai le aso, o lea ua ou matau atu ma ou vaai, faafetai mo le Tulafono.

O le Tulafono, e le malamalama gofie le Tulafono lenei, e lavelave, e faigata foi i lau vaai ma lau maitau, ae o le taua e faaaoga ai tekonolosi o ona po nei. O le matua advance lava o le tekonolosi lea ua ou vaai atu e aumai totonu o lenei Tulafono tau Faaofi, a o se Tulafono e taua, taua mo le tuufaatasia ma le teuina o faamatalaga a tagata taitasi uma i Samoa. O lona uiga o le identification system foi lea a tatou, o le a tofu le tagata ma lana numera e iloa ai ia ma mafai ona access i le computer a le Malo le database, e maua uma ai faamatalaga tau tagata lava ia. Ia o lea la ou te matau atu i lau vaavaai ma lau faalogologo foi i saunoaga faamalamalama a le Minisita, o le a tofu le tagata ma lana numera lea e taua o le Samoa Digital Identification number, fuainumera tumau. O lona uiga o le fuainumera tumau e tofu lava le tagata ma lana fuainumera e iloa ai lona soifua atoa i totonu o le atunuu.

O totonu la o le Numera lea po o le SDIN, o lea ou te vaavaai atu e i ai le Identity database o i la e tuufaatasia uma ai lava faamaumauga tau lou aso soifua, o lou suafa, e pei lava o faamatalaga uma foi nei e i luga o le pepa fanau. E pei e tau faapena i lau vaai atu i ai ma isi foi faamataga. Afai foi ua e maliu, ia e tuu ai foi ma le aso maliu, le aso na e maliu ai, i totonu o le faamatalaga ma le database lea, ma taua o le biographical data. O le biographical data lea o lea e tuu uma ai lava faamaumauga a tatou taitoatasi. O le aso na e faaipoipo ai ma faamatalaga uma lava, o lou afioaga, o fea na e soifua ai. Ia o ni faamatalaga taua, taua tele i so o se tagata aemaise lava i

nei ona po ma vai tau ua tatou i ai i le faaaogaina o faamatalaga nei i mea foi ia tatou te feoi ai. E faapea foi ma pisinisi ma totonu o le Malo.

Ae pau lava le fautuaga i lau Afioga, se i silaila lelei i le aoina ma le teuina o nei faamaumauga ma faamatalaga. O le uiga o lau tala, i tulaga foi lea i mea o le confidentiality o faamatalaga nei, ona e manatua foi, e i ai lava foi isi mea ia e masani ona tutupu, o tagata foi ia e 2 pepa fanau, e eseese igoa ae 2 pepa fanau. E ono tulai mai lava mea na i isi taimi. O lo o i ai le tulaga foi lea e tasi le tagata ae 2 ID. O mea uma lava ia e silasila i totonu o le system leni, pe o le tagata foi lea e faaoga igoa o isi tagata ina ne i oo i totonu o le tatou system lea ona tele ai lea o isi mau faafatuli, ia ma le tulaga foi lea o le faigofie ma access isi tagata i information o isi tagata. Aua leaga o isi tagata e le mananao e iloa fua e isi tagata tulaga o latou soifuaga ma tulaga tau le soifua.

E i ai foi la ma le isi database e tau o le biometric database, o le resitala lea faaeletoroni e teuina ai ata o foliga. O i la lea e mafua ai ona ou taua le mea lea o le advance o le technology lea ua agai atu i ai tatou, e teuina ai ata o foliga o tagata, so o se tagata lava, ma mea o faamatalaga ia tau le soifuaga o tagata, e le gata i ata o foliga, ae faapea foi mea o tulagalima. O tulagalima, e le gata i tulagalima a o le saina. O lea foi ou te vaai atu e pei e teu ai foi ma lau saina i totonu i i, silasila la i le tulaga. Ia ma isi lava mau mea ia tau le tagata lava ia. O lona uiga e faigofie ona tatou mafaufau i ni faafitauli e tulai mai i mea faapenei. O le malupuipua la o le system lea e agai atu ai, lea foi pei ona malie i saunoaga a isi sui le tulaga tonu tau le security ina ia secure lelei tatou database ia. A o lea la ou te matau atu, o vaega uma ia, e tele lava le galuega faaauau. O lona uiga o le cost foi o le system leni e fai si taugata, aua e tatau lava ona faaauau. E tatau ona update tulaga o ata o tagata ma isi mau faamatalaga faapena, e tatau lava ona fai ma update. O lona uiga o se galuega e faaauau pea, faaauau pea faaauau pea. E le taugofie la, e le taugofie foi le system, ae taua, o le matua taua lava o leni foi system.

O le tuufaatasiga la o mea nei o le resitala lea o pepa fanau, le electronic resitala o pepa fanau, o e fananau mai, maliliu, faaipoipo, tuufaatasi ma le resitala lea o le identity database lea o lo o tuu ai faamaumauga ia, faatasi ai ma faamaumauga uma ia o biometric database, ia ona tulai mai ai loa lea o le polokalame lea ua ou vaai ua taua, polokalame mo pepa faamaonia faatekonolosi e iloagofie ai tagata Samoa, po o lona faa-Peretania, national digital identification system. O le system atoa la lea. O le mafuaaga lena lea sa ou taua ai i le amataga e fai lava si faigata e le faigofie foi lele, aemaise tatou nei na soifua mai ma aooga mai i vaitaimi e le i i ai ia tekonolosi fou ua i ai i nei ona po. E le i faigofie i lau vaai, e tele foi la le ituaiga atamai e manaomia e galueaiina ai ma faatino ai leni foi poloketi, ae momoli le faamalo ma le faafetai i le tulaga, aua e le faigofie, ae taua tele.

O lea foi ou te matau e pei foi ona saunoa le Afioga i le Minisita, o lo o i ai le Komiti. E i ai foi le Komiti i totonu o leni Tulafono, Komiti Faufautua

mo Pepa Faamaonia e Iloagofie ai Tagata Samoa. O lona uiga o le Komiti Faufautua agai i le mea la lea o le tatou identification system lea. O le fautuaga lava ia i lau Afioga, o tagata uma nei e galulue i i ma totonu o le Komiti lenei, e tatau ona i ai ni latou tautinoga foi ia confidential oaths po o ni latou declarations ina ia aua ne i liki mai tua faamatalaga o tagata taitasi aua leaga e faigofie lava ona faaaoga e le isi tagata faamaumauga o le isi tagata. O tulaga faapena e tatau ona tatou mataitu lelei ia ma se i silasila i ai.

O le isi tulaga taua lea ou te matau atu, e i ai le mea o le inoperability o systems nei. Lona uiga o le fegaoioiai po o le fesootai. O lea la ua aumai e fesootai le system lea ma le tatou database foi lea o tusifolau. E taua tele aua e tatau ona malupuipuia lea vaega, aua e manatua foi o le tusifolau o le tasi lea molimau po o se faamaoniga o lou sitiseni Samoa, o oe o le tagatanuu o Samoa. Ae o lea ou te vaai i le tatou system e le mafai ona resitala ai se isi e le o se tagatanuu o Samoa.

E i ai nai vaega ou te tilotilo pea i ai ona e fai lava si maaleale i le isi itu i lau vaai, a o fautuaga. E taatia atu pea fautuaga, ona o le tulaga lava lea o le operate faatasi ma le faagaoioiai o systems faatasi o le fesootaiga lea ma le falemai. Ou te le tau fai atu i le vaega lea, ona o lea ou te iloa ma o lena foi e silafia e lau Afioga sa avea foi lau Afioga ma Pule Sili o le tatou Falemai i le isi vaitaimi. O mea o information uma la e i ai o tagata gasegase ma gasegase o tagata, ne i te i ua felavasai ona salalau lea o mea. Ae manatua foi, e faaaoga foi e fomai computers nei, ne i te i ua matuu atu faamaumauga o le isi tagata agai i isi tagata, e le tatau ona latou iloa pe silasila i ai, ia ma isi lava mau vaega. Atonu foi o lea ou te vaai atu aua e i ai foi avanoa o isi mea, ia pe tuu uma foi i ai i totonu i i isi mea e pei o aitalafu. Ia o mea la ia. O lona uiga a e fia iloa po o fai ni loans a le isi tagata ona e alu lea e te saili ma ave lau talosaga e te fia iloa. Ia ou te le iloa po o le a le mea o le a fia iloa ai fua e isi aitalafu a isi tagata. A o le uiga o le tala, o le malupuipuia, malupuipuia. Ia aua a aumai nei le pepa fai mai e 5 loan ia e i i o lea e... ia o le a la le mea o le a iloa ai fua e isi au loan. Ae pei e tau faapena le uiga o le tala lea e taumafai atu, se i silasila lelei i ai lau Afioga. E i ai isi vaega o le Tulafono e pei e tau feteenai i lau vaai. Lea e i ai le isi vaega lena e fai mai, e le agavaa tagata i lalo o le 18 tausaga i totonu e resitala i i, ae i ai foi le isi vaega lena e faapea mai, e agavaa tagata i lalo o le 18 tausaga. A o le fesili la e fia malamalama i lau Afioga, taatia ese le fetuunaiga lena ae silasila i ai po o le a le sao, a o le a le mafuaaga ua faaaoga ai le 18 tausaga? Aua o tatou, o le tatou tausaga lea ua faatulafonoina e taumatuaina ai le tagata, o le 21. Ae pe i ai se mafuaaga ua tuu ai i lalo o le 18, aua o le tausaga lea ua faatulafonoina e mafua ai foi ona faataoto i le 21 tagata palota pe a ausia le 21.

Ia o nai vaega ia ma nai manatu ia e faataatia atu i autafa o lau Afioga i le Minisita se i toe silasila i ai. A o le vaega taua lava lea e pei foi ona

faamamafa i saunoaga a isi sui usufono o le malupuipua o faamaumauga nei.

Ia, lau Afioga i le Fofoga Fetalai, faafetai mo le avanoa. Ia manuia foi le tatou Fono i lenei aso.

FOFOGA FETALAI: Malo saunoa. Atonu o lea ua faafofoga mai le Afioga i le Minisita, e tele foi nai itu ia e pei ona e lagalaga, talosia o i totonu o le Tulafono ia itu na lagalaga e le Taitai o le Itu Agai. Ae o le a lafo atu ia i lau Afioga i le Minisita aua lau saunoaga e faamalamalama atili nisi o mea na laga.

Oi, ia e faamalulu atu i le sui usufono mamalu mo Anoamaa 1, ua le maua atu. O le avanoa lea o lau Afioga i le sui usufono mamalu. Ia e faamalulu atu i lau Afioga i le Minisita.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): Lau Afioga i le Fofoga Fetalai ua i ai foi si manatu laitiiti o le itumalo e uiga i le tatou Tulafono, a o lea ua fai lau faaiuga o le a aloaia le saunoaga a lau afioga o le a lafo ia le avanoa i le Minisita, ae pei ua tautuauega lo matou tu atu.

FOFOGA FETALAI: Leai, o lea lava e maua le avanoa o lau Afioga i le sui usufono mamalu. E leai se mea, o lea ua ou toe faamalulu i le Afioga i le Minisita e lava a lona taimi e tali mai ai, a o le avanoa i lau Afioga i le sui usufono mamalu.

Afioga ALAIASA MOEFAAUOUO MALAGAITUTOGIAI SEPULONA MOANANU: Malo afua ailao ua maua i le alofa o le Atua i lenei taeao i le maleifua mai i faguga lelei o le paia o le Maota, ae a foi le tapuaiga mau a Samoa mai lava i ona ao seia oo i ona iu. Malo le soifua, malo foi le faatoatoa i le tatou faigamalaga i lenei tausaga. E talitonu lava o lo o auaiitia e le Atua lavasiga uma o le atunuu e pei ona i ai.

E faamalulu atu foi i lenei taeao ona o le tulaga o tatou galuega faataoto pei ona finagalo i ai lau Afioga. Ae na ou vaai lava foi lea i le mea lea sa tatou malaga ai i Ausetalia, sa tatou puea mai le taua foi o lenei taulumaga o fesili ma tali. Ae atonu e le o le taimi lenei. Aua na ou vaai i ai i le tatou malaga, se toetoe lava a misa le Itu Agai ma le Malo a. Ia ai o le mea lea ua vaoia ai foi lea mea i te'i ua toe tau... ae atonu e aoga mo le agai i luma ma le faamoemoe o le tatou Palemene.

Ae o le Tulafono ua faataatia mai, o le Tulafono lava ia sa amatamea foi le faigamalo talu ai, lea foi na agai ai e tufa le tai \$50 e tau aoao mai pei ona taua e nisi o sui usufono pei na tufa le tai \$50, a o galuega na sa amatamea ai i le tau aoaoina o information o tagata. Ia lea la ua tulai mai le faigamalo lea ua faaauau, le tatou Malo o lo o tulai nei, ona e taua. E ese foi le vaai

faaleagaga i le mea lea, a, e ese foi mau a tagata faale-Ekalesia i nei mea, ae o le mea lava ua agai i ai le lalolagi, e le toe mafai ona taofi e se isi.

O le mea foi ua leva ona tatou faalogo ai i fafo i atunuu, ua leva ona i ai mea ia o green card, mea faapena a atunuu tetele, a o lea lava ua oo mai lava. E pei ona ou fai atu, e le mafai ona tatou taofia, e aoao tatou talaaga e tuu i totonu o se masini e mauagofie ai oe, aua e le iloa foi pe aoga nei faamaumauga e tuli ai tagata faigata, e oo mai lava i lenei taimi o tau tuli lava le isi tama lea a tatou ua le iloa po o fea ua fai i ai. Ia, o lea foi ua ta vaai o le a faanumera fale, po o mea uma lava nei o lea e agaigai atu i ai, ona faigofie lava lea ona piki le mea la e te i ai. Po o fea lava e te fia lafi ai, e maua lava oe. Ia ae taua, tatou o foi se i fai lea mea, ave i ai tatou faamatalaga e fai ai ma faamaumauga, ae leai se mea o le a oo loloto ai fua i nisi mea pei o loan ma mea nei e le tatau ona aafia ai fua, e lavea ai le tagata e alu atu e resitala ita pe a suesue atili i tua mea ia. O mea lava ia a oe ia e te nofonofu lava ma oe, ae vagana ai mea e aoga mo le soifua maloloina. Atonu e alu alu ua lelei le faufauga o le mea, ia e le toe i ai ni ID palota o le tupulaga, ua alu atu uma lava i i e mafai ona faaoga le database lea e faafaigofie uma ai isi galuega i le agai i luma. O lea foi ua maua e le taugofie aua o lea foi o le a faavae le Komiti Faafoe po o le Komiti Faufautua. Ia o tupe uma lava nei mea, ae leaga o lea ua laasaga fou ua agai i ai le tatou atunuu, ia, talosia ia faapena ona faaoga tatau mo le manuia o tatou tagata. O lea lava e aumai e le Ofisa o Faamaumauga le taua ma lona aoga. Ae pau foi le mea, po o fea e fai i ai le taua, ae i ai foi lava tagata o la e taumafai lava foi e milomilo nei mea ina ia sao ai foi auala le lelei, ae o le faiga lava lea o le olaga e o faatasi lava le lelei ma le faaletonu. Ae lagolagoina le Tulafono ona o se laasaga fou, ae ono tatou vaai i le itu lelei o mea. Aua tatou te vaai i se itu faapea foi lea e faale lelei ae ia mafaufau mo le manuia faafaigofie o galuega. O le mea lava lea o le taumafai foi lea pei ona folasia e le Pule Sili i le la aso o le taugata o le feoai ae faigofie le galuega, e te manao loa e faafaigofie, ua e avoid ina le manpower ae ua e taumafai e computerise le mea, ona uma ifo lea ua e toe sau ua leai sau galuega e nofonofu ma e vaavaai atu, a na iloa lava e le faia le mea lea. Aua o lea o le a take over e masini le faiga o le galuega. So e lelei foi i le isi itu, ae i ai foi lona itu e faapena foi ona vaavaai i ai. I te'i ua naunau ina ia faafaigofie galuega ae faaitiitia ai o tatou tagata faigaluega o lo o manaomia ni galuega.

Ae o se manatu lea vaivai i lau Afioga i le Fofoga Fetalai, ia, e faapena foi ona lagolago ai le Tulafono ma lagolago atu ai foi le Anoamaa o lo o faatali mai o le a amata le resitala mo le tatou itumalo i le resitala aoao a le tatou Malo. Ia ma le agaga faaaloalo ia manuia le tatou Fonotaga i lenei aso.

FOFOGA FETALAI: Ia, malo saunoa i lau Afioga i le sui usufono mamalu, faafetai foi mo lou sao taua aua le tatou Tulafono Tau Faaofi ma le

lagolagoina foi o le tatou Tulafono. Ia o le avanoa lenei o le sui usufono mo Satupaitea.

Afioga Hon LAUTAFI FIO SELAFI PURCELL (Satupaitea): E faatalofa ma faafetai i lau Afioga i le Fofoga Fetalai. E faatalofa atu i lenei taeao i le alafai mai o le Palemene mo le faaauauina o tatou lafolafoga i tatou Tulafono Tau Faaofi.

E faatalofa atu i le Afioga i le Tamaitai Palemia ma le Kapeneta, faapea foi Afioga i Minisita Lagolago faapea foi lenei itu. Faatalofa atu i le Taitai o le matou Vaega nei aemaise sui usufono mamalu. E faatalofa atu i Ofisa Sili o Pulega o Matagaluega ua mafai ona tatou faatasi mai, faamalo le faamalolosi. E faatalofa atu i si ou itumalo aemaise foi le mamalu o Samoa o faafogafoga mai.

Lau Afioga i le Fofoga Fetalai ae le i avatua se manatu e fia avatu lava se faamaisega a lou nei sui usufono i si o matou alaalfaga i Satufia ona o le tuua o le Malo e se tasi o lupe faalele a si o matou nuu, ua amia e le Atua lona soifua, le susuga ia Toai Milo, sa auauna i le Ekalesia Metotisi i Aele, ma e le i leva ona auauna le susuga i le faifeau ae ua amia e le Atua. Ia, lo tatou nuu aemaise le tatou aiga, ia tatou faatuatua i le Atua e pule toatasi lava le Atua i lo outou soifua ma lo tatou ola. Tau ina ia maua se nofoaga o Toai i le lagi tatou te toe feiloai i se aso o i luma.

Faafetai i lau Afioga. O nai manatu pupuu lava. Atonu o le 2014 na ou taitaia ai le usugafono a Samoa i Meleisia, na talanoaina tonu lava le amataga o le mea lenei lau Afioga, e i ai Minisita i le taimi o i lalo o lau vaaiga le Ofisa o Fuainumera. Ia, o le anavatau o le fonotaga lea, aua ne i i ai se isi e galo, lea ua faaauau lava foi e le tele o nisi, don't leave anybody behind. O le auga lava o le fonotaga lea, ina ia maua uma faamatalaga ma fuainumera atoatoa o se nuu, fuainumera i mea o datas foi ia, ona o le taimi lena o le tele ia o fuainumera e le o maua, e le i maua ma e le i lelei le capture ina o fuainumera. Mo se faataitaiga o i latou e fananau mai, e i ai pepe se i tulou, e tau mai i le Matagaluega e resitala mai o latou aso fanau, e i ai lava isi e leai. O faaiipoipoga, e nonofo lava le ulugalii ia e le omai e resitala. O tulaga uma faapena, so we had the information but all over the place, they disjointed ae leai se auala foi lele e tuufaatasi ai, tuufaatasi ai. O le talanoaga la lena i le mafuaaga o le talanoaga i mea nei ua i ai isi na latou i ai i le fonotaga lea. Ma na tufa mai lea e le vaega sa organize ina le fonotaga ia matou Minisita mea ia o cards tai pei lava o lau ATM card. E i ai la le masini na o se mea foi lea e faataitai ai matou nei e le i oo lava e vaai i mea nei, e te alu atu la momono i ai lau card lea i totonu. Ia, na o lota fia iloa lava po o a nei mea, sole, e tuu atu i totonu, ae ou vaai atu, sole, ua sau atoa lava lou olaga i le mea lea, e leai lava ma se mea o ou vaai atu o misi mai i i, e amata mai le aso fanau, o aoga, e sau uma lava, e oo lava i au financial situation, o au tupe, o a uma lava mea, lea ua sau uma lava i totonu i i. Ona ou foi mai

lava lea ou faapea, e aoga le mea, e aoga i le mea lea o le aumai uma o faamaumauga o se atunuu, ia taumafai ia maua se faamaumauga atoatoa po o le latalata i le atoatoa. E pei la o le tali lea na talanoaina, o le National ID lea. Ia sa taumafai lava foi i lena vaitaimi i le faigamalo ona e le faigofie, e le faigofie le software e manaomia.

A o le popolega lava sa i ai lea la ua faaali e nisi sui usufono, o le mausali lea o faamaumauga faaletagata lava ia, your own personal information, lea o le a amata ona tuu loa i totonu o mea nei, ia ua salalalu. It can be. Lea tatou te vaavaai i ai i mea ia ua tupu nei, po o le a lava le fai mai o lea e faamausali faamaumauga, se ua i ai lava tagata o lea ua latou mafai ona latou faia, lea e alualu i luma le poto, lea ua tatou oo lava i le mea lea o le digital world lea ua tatou i ai, ua matautia lava le saosaoa. Ou te au i ai i le Tulafono lenei, ina ia tatou o faatasi ma le lalolagi, tatou o faatasi ma le lalolagi. E le mafai ona tatou nofonofo ae o le lalolagi i le taimi lenei ua i ai, e tatau ona tatou o faatasi ina ia aua ne i i ai se mea lea ua tia i tatou i tua, don't leave anybody behind. Aua o le mea lea e tupu, a i ai le nuu e le keep in base, they can left behind.

O le popolega lava ia te au, po ua lava le tapenaga a Samoa i taimi uma lava lea sa ou aofia ai, o lou mafaufau lava, e le laitiiti, ia tailo ia i latou. E le laitiiti le tapenaga o le mea lea o le infrastructure e mafai ai ona tatou faaaogaina le system lea to its full capacity, pe afai tatou te mananao i totonu o tatou falefaigaluega aua o le mea lea e fesootai i ai, e mafai ona intergrade uma tagata faigaluega i se information o se tagata po o le a le mea. Na o le tuu atu lava i totonu le numera o le tagata, ua latou iloa uma. Po o lava tapena lau Afioga i le Minisita, ia le tatou atunuu i le ituaiga technology e mafai ai ona tatou faaaogaina le ID card lea. E le taugofie, e le taugofie, ma e tatau lava ona tatou tilotilo totoa i ai.

O le faaaogaina o faamatalaga lava o le tagata ia, pei o le popolega lena ia te au, e avatu ma le agaga mama ina ia faamaopoopo uma faamatalaga o tagata uma o Samoa i se mea se tasi, ae i ai lava foi le au ulavavale e te i ua nonofo ma faaaoga ona te i lea ua faasau. E pei o le mea lea ta te tilotilo i ai, I'm very very careful ia te au ia, i i ai nisi foi latou te faaaogaseseina mea ia o le a tatou tuua i totonu. Ae o le system ia e matuai aoga. Ou te fesiligia foi, pe i ai lava se taimi e aua ne i tuua fua isi mea i totonu, information lava a le tagata ia, tuu pea information of National interest, a o personal pei o au financials, medical records, e tatau lava ona i ai se say a le tagata lea, ou te manao e tuu i totonu i i, ia e tuu loa i ai records a le falemai, ia ua matua leai sou privacy e tasi, e le toe i ai lava sou privacy, pei o le mea foi lele the big brother is watching you. O le mea lena sa ou nofo lava ae ou te faaeteete lava au i lou mafaufau, i se olaga o le a le toe i ai se pule a oe e taofia ai lava mea tau oe, o le a share uma i le lalolagi. E alu loa i totonu o le system, ia ona mafai lava lea ona tilotilo ai isi mau tagata i mea e te le manao oe e tilotilo fua i ai. E i ai se taimi, tuu lava na o information i totonu, o aso fanau,

o a uma mea faapena, a o personal information, tuu le avanoa i le tagata pe manao e tuu i totonu pe leai. O le security of information o se mea tele, o se mea tele. Ma e ono aafia ai le credibility o le system pe a pau foi i lima o e o le a latou faia ni auala e le tatau. Ma e i ai i totonu o le system lea le mautinoa e faigata, faigata ona access fua e se isi tagata information e le tatau ona access i ai.

Lau Afioga na pau ia o nai manatu, ae faamalo atu i le Afioga i le Minisita. Ia o nai motugaafa na e tuu atu, ae ou te lagolagoina le auai o tatou i le polokalame lea o le national identification. Ia a o nai motugaafa na e tapue ai le tatou faamoemoe ina ia silasila i ai ina ia aua ne i i ai i se taimi mulimuli faapea o lele ua salalau le a ma le a. Ia faafetai tele i lau Afioga i le Fofoga Fetalai mo lou avanoa.

FOFOGA FETALAI: Malo. Faafetai mo saunoaga faufautua mo le tatou Tulafono Tau Faaofi.

Tulai mai le sui usufono mo Sagaga 2.

Susuga MAULOLO TAVITA AMOSA (Sagaga 2): Faafetai mo le avanoa lau Afioga i le Fofoga Fetalai. Ae ta faliu ia i lou sa pei foi ona e foemua foi i le taeao nei ma faatulima i le Fonousu aemaise foi le tapuaiga a si o tatou atunuu.

A o le i avatua sina motugaafa, a o si nei avanoa e faamaise atu ai foi i aiga faavauvau o le matou itumalo i Afega foi i le valaau a le Atua i se tasi o matuatausi ua silia i le 90 tausaga le soifua ia To'e Tausilia ma le valaau foi a le Atua i le tausii ia Maria Fata Kelepi, ia faamaise ma faamafanafanaga le agaga o le Atua i aiga faavauvau.

Lau Afioga i le Fofoga Fetalai, ia o lea lava e tau vaavaai i ai i le aoatetele o le mataupu leni, o se faamoemoe taua tele. E i ai foi le lagolago a leni itumalo. E pei pau lava le mea lea ua laga e le tele o tootoo faapea foi lou nei tagata, o le popolega lava lea i le security. Ae manatu ua lava ma totoe ia tootoo ua saunoa i lea tulaga. Ae pei o lea e tau vaavaai ne i le maua se isi avanoa i le Afioga i le Minisita, pei o upu lava ia e tau mai nei o upu ia e pei e le masani ona tatou faaoga i le Gagana Samoa, pei o upu ia o biometric database ma mea faapena. Atonu po o se avanoa leni e silasila i ai, aua o lea e faaoga mai lava i isi tusitusiga o le Tulafono leni le upu lea o le faasinomaga. E pei a vaavaai la i ai o lo o faapea mai o se igoa puupuu, a o lea a faa-Peretania le Tulafono na o le 3 upu ae pei a faa-Samoa ua 8 upu. Ae a faa-Samoa tonu lava upu ia, pe le talafeagai le faasinomaga faatekonolosi o tagatanuu, ia ona taitolu lea o upu, ona talafeagai lea ae ua umi tele le tatou faa-Samoa, e le o paleni foi. E leai se Samoa i le faa-Peretania i le version la e i ai, ae a sau i le faa-Samoa i le Tulafono ua i ai le Samoa.

Ia e pei o nai upu na e tuutuu atu i ou tafatafa e silasila i ai ne i mea ua le maua se avanoa i le taimi o mea taitasi lau Afioga i le Fofoga Fetalai. Ma le faaaloalo lava.

FOFOGA FETALAI: Mo le silafia e le sui usufono mamalu e maea ona tuuina atu lea i le Komiti, o le isi avanoa taua lena mo sui usufono e faaoo i ai o outou finagalo pe a uma ona faaalua finagalo o sui usufono mamalu i lenei aso.

Ia se i tulai mai le sui usufono mo Aleipata Itupa i Luga.

Afioga FUAAVA SULUIMALO AMATAGA (Aleipata Itupa i Luga): Faafetai i lau Afioga i le Fofoga Fetalai mo le avanoa. E talitonu foi o lenei taeao o lea ua uma ona e sii le viiga ma le faafetai i lo tatou Tapaau Sili i le lagi, o le a ta aleaga ai pei ona taitai ai e lau Afioga i le Fofoga Fetalai lo tatou taeao.

E faatalofa atu foi i le Maota nei i le afio o le Tamaitai Palemia ma le mamalu o le Kapeneta, aemaise foi o sui usufono mamalu, Minisita Lagolago, le Taitai o lenei itu, aemaise foi o sui usufono uma.

E faatalofa atu foi i le mamalu o Ofisa Sili o Pulega o Matagaluega ma Faalapotopotoga ua tatou faatasi i lenei taeao, aemaise foi o le mamalu o nisi o le atunuu ua auai mai.

O le tulaga i lenei taeao e pei ona e saunoa, pei sa faatutugata le amataga i le taeao, e faamalulu atu ai foi i lau Afioga ua tuai ai ona faailoa atu tulaga o lo o i ai nai tuualalo foi ua taumafai i ai lenei itu, ona o lea e pei ona saunoa nisi o sui usufono, ia ona o le Tulafono lenei na amata mai foi i le Paeaiga ua tuanai i le faigamalo foi sa i ai. Ma e manatu foi la lenei sui usufono e lagolago i le Tulafono, ona o le agaga sa tapena ai, e tele lona taua i le faafaigofieina o galuega, fesootaiga i Matagaluega taitasi ina ia faafaigofie ona maua faamaumauga ma tulaga uma faapea. Ae o lea ua saunoa nisi o sui usufono i nisi o atugaluga foi lea e tau avatu ai foi se manatu, ia o le tulaga lava lea o le malupuipua, le confidentiality ma le accessibility o le information foi lele o tagata ona e i ai le tulaga foi lea e taua le maua o faamaumauga, ae pei e tau i ai le tulaga foi lele pe faapefea se tagata e taumafai lava ia e aumai atoa faamaumauga ona ia lava personal rights. E i ai lava tulaga faapena. Ne i te i ua i ai se isi e le manao e tuu i lalo le mea lea, faapea aemaise lava records e tai pei o le soifua maloloina aemaise foi o tulaga i finance, o loans ma mea faapena. Ia po o i ai se tulaga foi lele i aiaiga, aua o lea foi e te vaavaai pe e ono afaina ai le saolotoga lea po o le right o le tagata ae taua le agaga o le Tulafono. Ae ona o le manatu o le tagata e ala ai ona taumafai e le alu atoa ni faamaumauga, ona pei ona saunoa foi nisi o sui usufono, o lona ia lava privacy foi lele.

E i ai la le vaega lea o le Fuaiupu 17, lena e aumai ai le tuusaunoa foi lele o le resitala aoao i le mea foi lele liable, ia atonu o se tulaga e tataua ona

tapena maeaea i ai nisi vaega o le Tulafono ia pe tuu foi i totonu o le tulaga o Regulations, aua o lea e pei e tuusaunua le resitala aoao i tulaga ia, liable. Pe afai e i ai ni sese o le system, pe afai foi e i ai ni vaega foi lele e ono afaina ai le faia i se agaga le lelei foi lele, o lona uiga ua faaaoga le information o le tagata lea e pei e taumafai e black mail ai se isi i tulaga faapena ia ma ni amioga le pulea, po o ni uiga faatamala matuia. O lea la ua aumai i i o lea e tuusaunua ai le Ofisa ma tulaga faapena, ae pei o ni mea ia e tatau lava ona papuipui lelei, tapena lelei i ai ni regulations foi ia ina ia mautinoa e le faafaigofie foi e e o lo o faagaioia le system ona abuse, ina ia iloa foi e i ai lava aulape e ogaoga foi, pe a faapea e abuse le ituaiga information lea o le a faamaumau i totonu i i, leaga o lena e i ai le Fuaiupu 17 o le tatou Tulafono, pei o nai tulaga na se i autilotilo pea i ai ina ia mautinoa o lo o malupuipua, ma o le a faafaigofie foi i le mamalu o le atunuu ona lagolago ma aumai uma le sao ma le moni o faamaumauga, ina ia atoatoa ai ma lelei le faamoemoe ma le autu o lo o tapena i ai lenei Tulafono.

E i ai le Tulafono la e i ai nei i tatou faamaumauga i aso fanau ma pepa fanau ma mea faapena, aemaise foi o le igoa, e mafai ona toe sui lou igoa. Afai lava na fanau mai tai pei o au, o Amataga le igoa o la e na fanau mai ai, ia ae alu alu i se isi taimi manao e toe sui lou igoa ia Gataaga, ua le Amataga ae ua faai i le Gataaga.

Ia pei o nai vaega ia foi lea atonu e aumai se faamalamalamaga a le Minisita i tulaga ia. Po o le a le tulaga e mafai ai ona gata le suiga o igoa, pe faatasi, faalua, po o le mea a maua ita i lea mea toe sui le igoa i le isi mea, ia pe a faapena foi ona tasui ai lava ota ID numbers ma tulaga uma faapea. Leaga e pei lava ou te iloa o la e mafai i lalo o le Tulafono la e i ai nei o aso fanau ma tulaga faapena ona fai le tulaga lea. A o se tulaga foi lea ia gel lelei ma merge lelei le Tulafono lea o tatou IDs nei ma tulaga foi o nisi o Tulafono tuai ina ia manino e le alu alu pei o le api foi lea a le tamaitiiti e alu alu tape le isi ID ua sui le igoa, tuu le isi ID fou, ia mea uma faapena. O le talitonuga lava o lenei sui usufono o system faapenei, e mautinoa lava o le mea sa tapena e le tagata soifua. O lona faaleagaina foi e toe fai foi e le tagata soifua. Ia ma o vaega uma ia e tatau ona tatou taumafai e papuipui i ai ia faafaigata. Aua e tai pei lava o le mea lea e i ai nei, ua oo lava ina fai tatou internet banking, ia o la e milionea ai nisi e gaioi mai ua alu i luma le tomai, ua mafai lava ona gaioi mai le account a le isi ma tulaga uma faapena ma faaaoga i se tulaga faasolitulafono. E i ai foi la le popolega ona o le tulaga lea. E i ai foi le tatou database, ae faigofie ona hack e nisi ma sao i totonu ma aumai lota igoa ma faaaoga e fai ai nisi tulaga e le o ni tulaga taualoa ma ni tulaga talafeagai. Ae pei o tulaga na o lea e autilotilo atu i ai, ia o tulaga ia o lo o i ai tatou Tulafono i le fesuiaiga o igoa ma tulaga faapena, ae po o i ai foi ni papuipui pe faafia ona gata le suiga o le igoa. Ia atonu o le a faamanino mai e le Afioga i le Minisita ma le Ofisa tulaga ia.

Ia pau ia o nai motugaafa lau Afioga i le Fofoga Fetalai a lenei usugafono. Ma le faaaloalo lava. Faafetai.

FOFOGA FETALAI: Malo faafetai mo le sao foi taua aua le faafogafoga mai a le Afioga i le Minisita ma le teuteuga o lenei Tulafono. Ia o lea ua matau atu, tuu atu le avanoa i le sui usufono mai Vaimauga 2. Ia, le avanoa lenei lau Afioga i le sui usufono mamalu.

Tofa LENATAI VICTOR FAAFOI TAMAPUA (Vaimauga 2): Faafetai i lau Afioga i le Fofoga Fetalai e tusa ai foi ma le avanoa. E manatu e puupuu lava se lagona e avatu i le tatou mataupu, e talitonu foi o lea ua maea ona pau le tanoa a lau Afioga i le saunoaga a le Minisita e tali foi i le tatou Tulafono ma nisi o fesili.

Ia o se manatu lau Afioga, o se popolega a lou nei tagata. E lelei lava le faaoo atu pea ma faaleo atu pea o faafofoga le Minisita aemaise le Matagaluega, pei o le tulaga lea ia malupuipua tatou information ia. O le aso Gafua lau Afioga i le taeao o le aso Gafua ua tapena foi i si o matou faalavelave ae tatagi lau telefoni ua maua mai le meli po o le message, ona ou tago lea tatala. Ou vaai atu o la e muamua mai luma le ata o lou uso pito mai luma le ata o si ou tina, ia, rest in peace mum. A o le uiga o lau faamatalaga, o la e sau ai ma le message o faapea mai, hi bro, how are you and your family? Ona ou faapea lea, ai o si ou uso lea ua message mai, ia ou tali atu i ai, o lea e manuia mea uma. Ia ona toe tusi mai lea faapea mai, e i ai le mea lea ou te fia faasoa atu ia oe mo lou silafia. Ia ou fai atu, ia, talanoa mai. Ia ona faasoa mai lea fai mai e i ai le faamanuiaga la e i Amerika e mafai ona ou entitle ai. Ia ua amata loa ona ou masalosalo lea, pei lava e le o le tagata lea. Ou fai i ai, ia, faamatala auiliili mai. Ae sau le faamatalaga, fai mai e \$150,000 lana tupe la e ua i totonu o lona bank. Ia ou faapea loa, oi, e taufaasese la le mea lea. Ou tali atu loa i ai, ia aua ne i e toe imeli mai ia te au.

O uiga ia lau Afioga ona... ia malupuipua tatou information. O lo o i ai lava... o lo o agai lava i luma le tomai lea o le saili o ni auala e faoa ai meatotino a le isi tagata, ia ma le taufaasese ma le tulaga faapea. Ia pei o se lagona lea e fia faasoa atu i le Afioga i le Minisita aemaise foi le faafofoga mai a le Matagaluega i ni auala ia malupuipua ai information a le tagata.

E i ai foi la ma si au fesili faamolemole lau Afioga i le tulaga lea o le tatou passport, o le numera NPF, o le laisene avetaavale. Po o le mea o lea o le a standardize numera ia lea o le a issue mai e le resitala, po o le mea o lea o le a alu ai foi le numera lena i luga e faaoga ai lata passport, aua o mea e iloa ai lou nei tagata. Pei ona sau le igoa o le Tulafono, iloagofie ai tagata Samoa. Po o le mea, o lea o le a sau uma ai le numera lea e tasi e faaaluu ai le numera o le passport, laisene avetaavale, numera o le NPF, ia ma nisi o mea o lea e iloa ai lou nei tagata.

Ae lau Afioga, e talitonu i lenei taeao, e lagolagoina e lou nei tagata aemaise si o matou itumalo, ona o le agai i luma o le lalolagi nei, e le tatau ona tatou mamao i tua, e tatau lava ona tatou pipii i ai. O lea e lagolagoina ai foi e lou nei tagata le tatou Tulafono, ua mafai ai foi ona ou tilotilo ma ou manatu i se taimi o i luma, i se aso o le a faapea mai se isi o lau fanau, faapea mai, dad, o la ua sau uncle e \$160,001 o la ua i luma o le Ofisa o la e faatali mai ia oe.

Ma le faaaloalo lava, faafetai i lau Afioga mo le avanoa.

FOFOGA FETALAI: Ia o lea lava ua matau atu e le Nofoa, o tatou sui usufono uma lava o le malupuipua lava. Ia, ne i te i foi ua toe malupuipua mai nisi sui usufono ae ua matua mautu lelei le malupuipua, ua faafofoga ma le manino le Afioga i le Minisita.

Ia se i tulai mai le sui usufono mo le Vaa o Fonoti.

Tofa MAUU SIAOSI PUEPUEMAI (Vaa o Fonoti): E momoli atu le agaga faafetai tele i lau Afioga i le Fofoga Fetalai ua maua foi se avanoa o lenei itumalo o le vaa e tasi i le atunuu e tusa ai foi o le Tulafono e pei ona folasia nei i le Laulau-a-Fono.

E auai lenei itumalo e tusa ai foi o le taulaga siitia e pei foi ona e muai asa ai le ala o le faailoagamanu e pei o le tala e fai i le atu Fagaloa. O lea foi ua e sisi le fua o le manumalo o Keriso, aua foi foliga vaaia aemaise o le mamalu o le Atua o lea ua tatou molimauina i lenei foi taeao fou.

Ia, a o le i faia se lagona foi o lenei itumalo o le Vaa o Fonoti, e fia momoli atu nai faamanuiaga i le Failautusi o le matou Pulega, le Susuga ia Harima Mamea, o lea ua penisione malolo manumalo. Ia o lea sa taumafai atu se leo, le tatou Pulega e ala i le tofi Tiakono Toeaina, a o lea ua tatou oo mai i le malaetele, o lea ua faaleo atu e le sui usufono o le Vaa o Fonoti. E momoli atu ai ma faamanuiaga, ia manuia tele le faiga malologa, faamanuia le Atua i ala uma aemaise foi o nisi faamoemoe e faaaogaina ai pea lo oulua soifua.

Ia e le itiiti foi le agaga e avatu ai foi le agaga faamanuia i le Tama Toeaina foi o le Matagaluega le Susuga ia Roma ma le faletua ia Wilma, e tusa ai foi o le penisione malolo ai manumalo, a o i ai i galuega lenei foi Matagaluega a Apia Sasae.

Lau Afioga i le Fofoga Fetalai e lagolagoina e lenei itumalo le Tulafono lenei. E ese le taua o le Tulafono lenei. Ae i ai lava nai vaega laiti ia e fia molimoli atu i lau Afioga i le Minisita aemaise foi o le Matagaluega, aemaise foi o i latou uma o lo o i ai i totonu o le tapenaina atoa o le faamoemoe lenei. O lea ua faafogafoga atu foi ma le toto ai le tele foi o nisi o saunoaga a sui usufono mamalu, e ese le taua. Ae o lau lava tuualalo i lau Afioga i le Minisita, ai lava se manaia o le faamoemoe lenei, fai lava pei o le faiga foi lea e fai ai tatou pepa fanau, na o lou suafa lava ma le aso sa e soifua mai ai ma tulaga faapena, ae taofiofi uma a tatou faamaumauga. O lea e pei ua tele

ina sausaunoa nisi o sui usufono mamalu, o le popolega o le itumalo lenei, o le itumalo lenei e tupuga mai ai tagata maumea, ioe. O le popolega lena o lea e i ai. A o le Tulafono lenei, o se Tulafono e taua tele. O lou popolega o lou lava tagata, e fai si tele o au teugatupe i faletupe, masalo e leai lava se faletupe o le atunuu lenei e le o i ai ni nonogatupe se tele. A o popolega ia, ua tele nogatupe ae laiti aitalafu. O le tulaga lena lau Afioga i le Fofoga Fetalai. Se i toe silasila ifo lava lau Afioga ma le Matagaluega pe le lava le vaega lea, tai pei o le faiga o le faatulagaina o tatou aso fanau. A o tulaga uma i faamaumauga, ae a pe a faataatia ese. Ia ona o lenei vaitau e le na ma le laina, ia o lea ua saunao foi lou uso a faipule ia Lenatai, e \$150,000. E ta le 12 anapo, e 3 lelei messages na sau i lau telefoni, ae ou tilotilo atu, e le ni tamai tupe, e tai \$1 miliona agai i luga. O tulaga la ia o lea e pei e popole ai. O faamaumauga a tagata ia e le tatau ona silafia. O aso nei ua faigofie lava ona access ua oo lava i le tamaitiiti lea 12 tausaga, ua atamai lava e fai auala faaenionapo e faitau ai, aemaise lenei vaitau ua tele le atamai. Tatou te fiu lava e nana, ta te te i lava ua sau i luga tulaga o lota tamaliiga ae le tatau ona latou silafia. E pei o le itu lena lau Afioga i le Minisita aemaise foi le Matagaluega, ua lava a ia faamaumauga e aua foi ne i silafia e le toatele, aua ou te popole foi au ne i tuu uma i ai vaega ia, ia e toatele le au ulupopoo, tulou lava le gagana ma le faafogafoga mai a le atunuu. Ia ne i faitau faitau se isi faapea, o le ulupoo la lea. Alu atu lea o se mea afaina ita ae le o lota ulupoo lea e ona faamaumauga ia. E pei o nai vaega ia lau Afioga i le Minisita e avatu ai se tuualalo a le itumalo o le Vaa o Fonoti, se i toe silasila ifo lava pe le lava a vaega ia, ae aua ne i talagafa atu i tua le tatou faamoemoe, aua o le upu moni ua sau i luma le atamai, ua faigofie lava ona alu i luga alu i lalo, saeu alu faapenei, fiti uma mai ota faamaumauga ona maua ai lea... pei o le itu lena o lea ou te popole i ai. Ou te talanoa atu ona o au ua fai si loa o faipisinisi, ou te le manao e ... ae ou te talitonu foi e leai se faipisinisi i le atunuu e le manao e silafia e lea tagata ma lea tagata ana ia lava faamaumauga, faitalia aitalafu ia po o fea le mea e fai i ai, o le olaga lava a e le ola aitalafu e te le milionea.

Ia pei o nai lagona ia lau Afioga i le Fofoga Fetalai, ae afai foi ae faagasolo, manaia ia pe a tai \$100 la e toe alu atu ai le tatou faamoemoe lea. Ou te talitonu e leai se isi e toe lafi aua o lea ua siitia i luga le seleni, ae ou te iloa foi o le a faafaigofie e agai atu foi le Ofisa mo nisi o faamaumauga, o le a televave mai ai foi ma faafaigofie ai foi i le aufaigaluega ona faamaopoopo ma aoao mai aua o lea ua siitia le seleni.

Ia, ae na ona taatia atu lava i lau Afioga i le Minisita, a o le Tulafono e pei ona auina mai, e taua tele ma e lagolagoina foi e lenei itumalo.

Ia, lau Afioga i le Fofoga Fetalai, faafetai mo le avanoa. Ia manuia foi le Fonousu a le atunuu.

FOFOGA FETALAI: Malo faafetai. Ia se i tulai mai le sui usufono mo Siumu.

Tofa Hon TUUU ANASHI LEOTA (Siumu): Faafetai. Faafetai i lau Afioga i le Fofoga Fetalai. Masalo o paia o le taeao ma le aso o le a le toe oo i ai se faamatalaga ua maea paelago e lau Afioga ma le maualuga foi o sui usufono ua maea sausaunoa i lenei taeao. E momoli atu ai le faamalo i lau Afioga i le tulaga foi ua faagasolo ai le fonotaga i lenei taeao. Ae le i faia la se faamatalaga lau Afioga, na ona ou toe fia pai atu foi i si ou itumalo, ona ua i ai foi nisi o tulatoa ua amia e le Atua i lenei vaitau. E fia momoli atu ai le faamaisega ma faamafanafanaga foi i aiga i le tuumalo o le afioga i le alo o Asomua ia Tupuola Pati o se tasi foi o tama matua o le itumalo. Aemaise foi o le usugafono a se tasi foi o tulatoa o lenei itumalo, le usugafono a le fetalaiga ia Tuuu Kenape Faletoese. Ia, o nisi ia o si ou itumalo ua faapena ai ona lagia le paia ia Sa Asomua ma Aiga, le Fetalai ia Tuuu ma le mamalu o lenei itumalo e molimoli atu ai faamaisega i aiga ona o le valaau paia a le Atua. Ia o le finagalo lava o le Atua ia e tutasi e leai se isi e sua le finagalo, o le tao e velo i le maninoa, o le tia foi e le maseua. Faafetai i lau Afioga i le Fofoga Fetalai.

Ae o lou tulai atu, e lagolagoina foi e lenei usugafono le Tulafono. Ou te talitonu e le o se Tulafono e faigofie. A faitau atu i le Tulafono, e fai lava si tele o lenei Tulafono, ae le mafai foi la, ma e le tatau foi ona faanatinatia ona e le gata e taugata ae tele tulaga e ono aafia ai le faamatalaga o tagata taitoatasi.

O lea ua saunoa le Afioga i le Minisita sa amatamea i lenei Tulafono ma ua aumai lona finagalo i le tele o mea ia e popole i ai. Ia, aua o lea ua tatou tafai popole uma ai lava i le mea lea ua aumai ai le finagalo, e tele le afaina, ae faafetai. O lea la ua finagalo le faigamalo e faaauu pea, faaauu pea le mea, ona e talitonu lava o se galuega e lelei, talafeagai foi i lenei vaitaimi o tatou faagasolo i ai, ae pei lava ona aumai, o le puipuiga lava o le saogalemu. E i ai se manatu sa faalogologo mai lava i le tau amatalia o le polokalame lenei, sa fuafua agai ina ia aoga mo le faiga palota. Ona i ai lea o se manatu foi lea, a tatou taumafai lava lau Afioga i le Minisita i vaega ia ina ia talafeagai e faafaigofie ai mo le tau faia atoa o nei ID pe a oo i le taimi o faiga palota, tatou agai i nai mea ia se 3. A ua lava a le faaogaina mo le soifua maloloina i tatou faamatalaga ia i le falemai, faamatalaga e aoga i le palota, aemaise foi o faamatalaga e aoga i penisione ia taumafai e tasi ia faafaigofie ai le mea lea. Aua a tatou vaavaai atu nei i le mea lea e aumai ai le popolega, aemaise lava o mea ia o teugatupe ia ma isi faamatalaga foi ia tatou te manumanu i ai ia aua ne i salalau atu i tua.

O le tulaga lena lau Afioga i le Fofoga Fetalai e auala atu ai i le Afioga i le Minisita, silasila totoa, faifaimalie. E le o se mea e ono faanatinati a o lea e silasila atu i ai e taugata leaga a tatou o nei e saili uma mea nei e finagalo i

ai le faatulagaga o le mea lenei, e anoanoai lava, e anoanoai ae ono tulai mai ai faafitauli ia ua aumai ai finagalo o le salalau atu o au lava faamatalaga e te le finagalo oe e iloa ma silafia e nisi. Ae a agai lava le tatou galuega lea ina ia tulaga mai ai tatou mea ia e faatulaga i palota, mea o faamatalaga i tatou penisione, faamatalaga i falemai e faafaigofie ai ia o atu so o se sui lava ua faigofie ona maua faamatalaga mo le falemai i tatou vailaau ma mea uma faapena, ia ae o isi vaega uma, atonu e faasolosolo malie mai i se taimi.

Ia o se famatalaga puupuu lea lau Afioga i le Fofoga Fetalai. Faafetai mo le avanoa. Manuia le tatou Fono.

FOFOGA FETALAI: Malo faafetai. E talitonu foi o lea ua faaalua foi finagalo aua foi le fesoasoani i le tatou Tulafono. Atonu o se taimi faamanino foi e le Afioga i le Minisita taualumaga uma o le tapenaga o lenei Tulafono Tau Faaofi. Ae ua i ai le manatu leaga o lea ua tatou taunuu mai i le taimi o le tatou malologa masani o le taeao. E faasilasila atu ua faataatiaese nei Galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:44 i le taeao ma toe faaauau i le 11:20 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Ua maea paleauau le tautege a le paia o le Palemene e ala i le taumafataga o le taeao, e talitonu foi ua faaosofia moegaluaga ua maua foi se faasiligamalosi e afaafa ai le tatou galuega.

E faataatiaese tatou galuega mo le malologa ua maea le saunoaga a le sui usufono mo Siumu. Ia, e matau atu e le o toe toatele nai sui usufono mamalu o lo o tau tulai mai e fia saunoa.

Ia, o le avanoa lenei o lau Afioga i le sui usufono tamaitai mai Alataua Sisifo, lau Afioga Aliimalemanu.

Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai – Alataua Sisifo): Faafetai i lau Afioga i le Fofoga Fetalai mo so matou avanoa. E faatalofa atu foi i sui usufono mamalu o le Palemene faapea Samoa ua tatou potopoto i lenei itula aemaise foi o le faafofoga tapuai mai a Samoa. Faafetai foi i le Ofisa o le Fono mo le faasiligamalosi i sui usufono mamalu o le Palemene i lenei taeao.

E fai sina manatu. O le tele o mataupu ua uma ona laga e nisi o sui usufono o le a le toe oo i ai se faamatalaga, ae i se talitonuga o lenei sui usufono i le tatou Tulafono, e so o se polokalame lava po o se poloketi fou, e i ai lava

popolega ma faafitauli i so o se mea e fai i mataupu e ono tutupu mai. Ae i ai le talitonuga seiloga lava e faatino ona faatoa iloa lea o faafitauli ma ni teuteuga e faaleleia atili ai. Ma e tatau lava ona fua i manaoga o le atunuu ma le auga na ala ai ona i ai se tofa e fai lea polokalame. E piitia ai se isi o saunoaga ua uma atu e faifailemu, amata faafasitepu le faatinoina o la tatou polokalame.

O le tulaga e popole i ai o le sao o faamaumauga. O lea ua uma saunoa le toatele i le security, a o le sao o faamaumauga e tuuina mai. Pe i ai se fuafuaga po o ai na te verify pe faamaoniaina faamaumauga nei o le a tuuina mai e tagata taitoatasi aua ou te talitonu lava o le auga atoa o le Tulafono lenei e aoga mo le tapenaina ma le faiga o faaiuga mo le atinaeina o le atunuu. O le tele ia o le aoga o le poloketi lenei pe a oo ina mauu uma faamaumauga, o lea e i ai foi le popolega o nisi o sui usufono. Ae i ai lava lou au lagona toatasi, sa faapea foi ona i ai ni popolega i ia foi atunuu e pei o Niu Sila lea e faaoga ai ituaiga metotia nei, ae sa fai lava ma teuteu ma faaleleia atili ina ia fua foi i manaoga o le latou atunuu. Ae a matau foi i ai a ta alu i le falemai i Niu Sila, na ona ki atu lava o lata ID lea e avatu alu ane uma lava, ae na o oe lava ma le fomai lea e vaavaai i ai i tulaga faapea faasoifua maloloina. O lea ua uma ona saunoa nisi o sui usufono i le security, a o se tuualalo, o le sao o faamaumauga o le a tuuina mai pe i ai se mea e toe verify ai, pe faaoga sao mai loa ni faamaumauga o lo o i Matagaluega a le Malo e amata ai. A o se tuualalo lena, e fai faafasitepu, e tatou te maua mai ai lesona mai le isi mea ona faagasolo atu lea i le isi tulaga.

O se tuualalo e matau atu i le saunoaga a lau Afioga i le Minisita le faaogaina foi o le tatou ID lea mo faiga palota. Ona ou mafaufau lea, afai o le a faaoga a o lea e i ai le tulaga foi lea e te filifili le sui usufono, le sui lea e tauva, po o fea le matai a o fea foi le itumalo lea o le a tauva mai ai. Ona ou faapea lea, pei lava la o le a le fetau, aua o lau ID la lea o le a fai o lea o le a ID generally, e le i ai uma ou suafa matai e le identify ai foi le itumalo palota lea o le a e tauva mai ai. Ae na o mafauauga e tuu atu ae le i amata ona faatino la tatou polokalame. Ae o se polokalame e taua tele, lea foi e i ai atugaluga i aiatatau a le tagata e ave i ai ana faamaumauga. E i ai lou talitonuga, a oo loa ina oo i le tulaga lea, ua le aoga atoa lava le polokalame, aua foi o lea o le a ave na o mea e te fia manao e ave, ia faamaumauga. Ia, o le auga lena o se lagona i le verify po o le faamaoniaina o faamatalaga, pei ona saunoa le Vaa o Fonoti, ia afai lava o lea e fai mai ia e fia miliona ana tupe la e i ai, e le mafai ona faamaoniaina e se isi ia tulaga.

Ia, o nai motugaafa na a lenei itumalo e fesoasoani ai i la tatou Tulafono o se polokalame e aoga tele mo le agai i luma aemaise le fuafuaina o le atinaeina o le tatou atunuu ma le tamaoaiga. Ia manuia le Fono.

FOFOGA FETALAI: Malo faafetai. Faafetai mo le sao foi mo fautuaga mo le tatou Tulafono Tau Faaofi.

Ia, e maitau atu lau Afioga i le Minisita... e i ai se... le sui usufono o Vaa o Fonoti, e i ai se isi mea e...

Tofa Mauu Siaosi Puepuemai: Faafetai i lau Afioga i le Fofoga o le Fono, faafetai foi mo le tapenaga o le faamalosigatino a le tatou Palemene. Ia leaga o lea e pei e faalogologo atu o lea ua saunoa le Afioga i le Tamaitai sui usufono, leai ou te le o fai atu foi lea a mea o au e tele ni miliona o i ai. E leai, o se tala foi lea sa tau faataitai.

Ae i ai la ma si vaega lea sa pau lau Afioga i au faamaumauga aua o lea ua maua lou avanoa, le vaega i le itu foi lea i le tagata la lea e faaletonu, faatasi, faalua, faatolu ona molia i Tulafono, a o Tulafono sili ona ogaoga, e aoga ai loa la faamaumauga ia. Ae ai lava se manaia foi lau Afioga i le Fofoga Fetalai e avatu ai foi se tuualalo i le Afioga i le Minisita ma le Matagaluega, e manaia la le ituaiga faiga lea, e fai tonu lava mo i latou ia e tele le solitulafono ina ia silafia ai e le mamalu o le atunuu. Loka nei, 2 masina toe tatala mai toe soli le Tulafono toe soli le Tulafono, aemaise lava Tulafono e sili ona ogaoga pei o le talepe fale, o le tulaga i le gaoi, tulou, le tulaga foi i le fasioti tagata. E pei o le isi lena itu ou te lagolagoina ai le isi vaega lea i le Tulafono lea, a o le isi itu, pei o puipuiga ia. A o le faasilasilaga ma le faamaninoga o le vaega lea, ia e leai, ou te le o fai atu nei, o lea lava e fia ola lava si o matou pitofale, o lo o taumafai foi nai atinae.

Ia pei o le toe tulai atu ai ma le agaga faaaloalo, ae faafetai mo le avanoa faalua.

FOFOGA FETALAI: Ia, o lea la ua vaai atu ua toe maua ai ma le avanoa o Ale talu ai lou toe tu faalua mai. Se i tulai mai lau Afioga i le sui usufono mamalu le Igoamatua.

Tofa ALE VENA ALE (Faleata 4): Faafetai i lau Afioga i le Fofoga Fetalai mo le avanoa. E puupuu lava le folasaga a le sui usufono mo Faleata 4. Lau Afioga o lea ua taoto i paga tulaga o lenei taeao i le viiga o le Atua e faapea foi le paia o le Palemene ma le faafogafoga tapuai mai a le tatou atunuu.

Ae o lou tulai atu, ina ne i leai se leo o Faleata 4 i le Tulafono lea, lau Afioga i le Fofoga Fetalai, lau Afioga i le Minisita, e matua lagolagoina e lenei itumalo le tatou Tulafono. Ia soifua manuia le tatou Fono i lenei taeao. Faafetai.

FOFOGA FETALAI: Ia, malo faafetai. Lau Afioga i le Minisita, o le avanoa lenei e te sausaunoa ai foi e faamalamalama nisi o itu taua na lagalaga i saunoaga a sui usufono mamalu. Lau Afioga i le Minisita.

Afioga Hon LEOTA LAKI LAMOSITELE (Minisita mo le Ofisa o Fuainumera Faamauina): Faafetai i lau Afioga i le Fofoga Fetalai mo le avanoa. E faatalofa atu foi i le paia o le Maota i leni taeao aemaise foi o le paia o Samoa o lo o faalogologo mai.

Ia, o lea ua faalogologo foi ma le totoā e tusa ai foi ma le tulaga ua aumai ai finagalo o tatou sui usufono e tusa ai foi ma le Tulafono e pei ona faataatia atu. Ma e maitau atu i le faagasologa mai foi o finagalo, e pei o lea lava e tau faavasega atu agai i le tulaga lea i mea taua ia o le popolega. O popolega ia i le tulaga o le sao ma le atoatoa o faamaumauga. O le isi popolega lea o lo o i ai i le aiatatau i le faaogaina foi o lea polokalame pe a faapea e pasia le Tulafono, ona o lo o i ai le mau a nisi o sui usufono o lo o i ai foi isi tagata o lo o faafesiligia le tulaga lea i le aoina mai o faamatalaga e tusa ia latou o la e i ai le latou aiatatau. Ia ma le vaega aupito taua lea o le malupuipua o faamatalaga, o le upu lea o le security o faamatalaga i lona aotelega.

Mo le silafia e le mamalu o le tatou Palemene, e pei ona taua i le faamatalaga ananafi, o le tele ia o le soalaupule sa fai i totonu o le tatou atunuu, sa fai faatalatalanoaga ma le mamalu o le tatou atunuu e tusa ai foi ma le faatulagaga o le tatou Tulafono lea, ma e tele faamatalaga na maua mai ai i ina, lea sa mafai ai ona faufau ma le totoā le Tulafono e pei ona faataatia ai nei. O le naunautaiga o le tatou Matagaluga o lo o nafa ma le faatinoga o le galuga lea, ina ia atoatoa, maeaea ma tapenapena lelei, faaaupega lelei faaupuga i totonu o le Tulafono, ina ia mafai ai ona puipua lelei atugaluga, faapea foi la ma luitau o lo o faafeagai ai, pei ona taua e le tele foi o sui usufono.

E mafanafana lava le loto i le faalogologo atu i le augani mai o sui usufono i le lagolagoina o le Tulafono ma latou fautuaga o lo o aumai, e aoga, aua e le o po se lilo e aoga tele le Tulafono ia tatou. E pei la o le isi luitau lea e faatulai mai foi i nisi foi o finagalo na maua, po o le a la le tonu, pe te resitala pe leai, pe a faapea e pasia mea uma nei. O la lava la e i ai lou... o lea e faapea mai pe e te resitala pe leai. Ia pei o se manatu lautele foi lea e avatu foi e faatupu manatu, ae le resitala, ia o le ituaiga mea foi lele pei uma lava o lou alu i le bank. A e alu atu i le bank e te manaomia sau fesoasoani, ona faapea mai lea o le bank, aumai le mea lea, aumai le mea lea, aumai le mea lea. A leai, e leai foi la sau faamanuiaga e maua. E pei o le tali puupuu lena i ai i le faatinoga o le mataupu lea. A faapea o lona uiga o le a le aafiaga o oe pe a faapea e te le finagalo e resitala. Ae a faapea la e te resitala, ia ona faapea mai foi laia, ia o lo o i ai la faamanuiaga ia lea o le a e agavaa i ai.

E pei o le agaga lena o le faataatiaga o le tatou Tulafono. Aua e 2 vaega o le tatou polokalame, o le faatu muamua o le tatou Tulafono, ona see atu loa lea i le faatinoga o le faiga o se polokalame talafeagai ina ia mafai ona i ai lona sootaga lelei ma le Tulafono e mafai ai la ona faatino le faamoemoe lea. I lona aotelega e faamauina ma le faaaloalo finagalo sa faaalua, ma ou te

talitonu o le a tele le avanoa e mafai ai ona toe faatalatalanoaina le tatou mataupu lenei pe a oo foi i le taimi e aumai ai le Lipoti a le tatou Komiti.

Na o le pau lava le vaega lea sa tau toe fia faamanino atu, ona o le Tulafono lea e faapea mai, e 18 tausaga agai i luga e mafai ai ona e resitala e eseese ma le Tulafono o le palota e 21 tausaga. A o isi la mea ia o lo o faataatitia i totonu o le Tulafono, lea la e faamanino ai vaega sa fesiligia foi i le tulaga lea po o le a le tausaga e mafai ai ona e lesitala. Aua o le tulaga foi lele, o lou fanau mai loa ona mafai lea ona e lesitala. O lo o i ai lava le sootaga o isi Tulafono ia o lo o i ai nei, e mafai ona taumafai e soo faatasi ai ma le tatou Tulafono fou lea pe a faapea e faatulai mai. O se faamatalaga lea i le mamalu o le tatou Maota. Faafetai mo le avanoa.

FOFOGA FETALAI: Ia faafetai malo saunoa i lau afioga i le Minisita.

Na faamaonia le lafo ma faitauina le Tulafono Tau Faaofi o le Pepa Faamaonia Faatekonolosi e Iloagofie ai Tagata Samoa 2023 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le Vaega Tau le Tamaoaiga mo le iloiloaina ma toe lipoti mai i le Fono Aoao i se Fonotaga o lumanai.

**TULAFONO TAU FAAOFI O TEUTEUGA O LE TULAFONO O LE
FAAPUTUGATUPE MO LE LUMANAI MANUIA O
TAGATA 2023 – faitauga faalua**

FOFOGA FETALAI: Ou te tapa lau afioga i le Minisita o le Faalapotopotoga mo le Lumanai Manuia o Tagata, Hon Mulipola.

Afioga Hon MULIPOLA ANAROSA ALE MOLIOO (Minisita mo le Faalapotopotoga mo le Lumanai Manuia o Tagata): Lau afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023 i lona faitauga faalua, ma ou te fia tautala faamalamalama i ai.*

Faaluaina e le Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei ma le Minisita mo Punaoa Faalenatura ma le Siosiomaga.

Afioga Hon MULIPOLA ANAROSA ALE MOLIOO: E faafetai i lau afioga i le Fofoga Fetalai mo le avanoa. Ou te talitonu foi ua maea ona e

siitia le taulaga osi i le Alii, tatou te faanonomanu ai i ana faamanuiaga a o alo lau Palemene, i le lauliliuina foi o Tulafono e pei ona opea i le Maota. Ae ou te fia tautala i le aotelega o lenei Tulafono.

O le Tulafono Tau Faaofi o le Teutuega o le Tulafono o le Faaputugatupe mo le Lumanai Manuia o Tagat Samoa 2023. O le sini lava o lenei Tulafono taufaaofi, o le faavaeina lea o se Taiala Faavae Faaletulafono, aua le fuafuaga mo le faaputugatupe o faamanuiaga mo i latou e i ai aafiaga tumau o le soifua. O le atinae mo le soifuaga lautele o tagata e pei ona folasia i le taiala mo le lumanai manuia o tagata Samoa 2021/2026 o lo o laualuga ai lea i le faataatiaga o taumafaiga a lo tatou Malo. O le naunautaiga ia maua avanoa tutusa i so o se auunaga mo e le tagolima. O tina ma tama matutua aemaise i latou o lo o i ai aafiaga tumau o le tino.

O le faamoemoe o le Tulafono Tau Faaofi, o le faaofiina lea o se vaega 12A fou, i totonu o le Tulafono Autu a le Faaputugatupe mo le Lumanai Manuia o tagata Samoa, NPF, ina ia aiaia vaega nei.

Muamua, faavaeina o le faaputugatupe, mo i latou e i ai aafiaga o le soifua ma ofisa e fitoitonu i ai le faafoeina o lenei faaputugatupe.

Lona 2, o manaoga e tatau ona ausia ina ia agavaa ai i lenei faamanuiaga.

Lona 3, o le faavaeina o se tusi lesitala, e faamauina ai i latou uma e agavaa i lalo o lenei faaputugatupe.

Lona 4, o le mafuaaga e ala ai ona le toe agavaa.

O le naunautaiga o le tatou Malo lau afioga i le Fofoga Fetalai, ia faasafua e le Faaputugatupe mo le Lumanai manuia o Tagata le NPF lenei faamanuiaga. E faaaogaina ai le sistema po o le system a le NPF o lo o faaaogaina mo le faasafuaina o faamanuia mo tagata matutua po o le penisione. Aua o le taimi lenei o lo o totogi atu nei faamanuiaga, e le Ofisa o Tupe i totonu o tusitupe.

O lenei faamanuiaga e tasi \$100 i le masina, ma o lo o faatupeina lea i le Tala Faatatau Autu o le Tupe a le Malo. E agavaa ai so o se isi, mai lava i le pepe faatoa fanau mai seia paia le 64 tausaga, ua faamaonia o lo o i ai aafiaga tumau o le tino. Ma e tuuina atu le talosaga ma e lesitala i le Matagaluega o Tina ma Tamaitai.

E mafai foi ona talosaga le tagata o lo o tausia le tagata e i ai manaoga tumau o le tino, ae ia i ai se faamaoniga a se faifeau. O lenei faamanuiaga e le o aafia ai tupe a le aufaisaofaga, faapea penisione a tagata matutua. O le Matagaluega a Tina ma Tamaitai faatasi ai ma le Ofisa o le NPF, o le a nafa ma le faasafuaina o faamanuiaga a i latou, e i ai aafiaga tumau o le soifua, disability benefit, e nafa ma le faatinoina o lenei Tulafono.

O le Matagaluega o Tina ma Tamaitai e nafa ma le iloiloina o talosaga tuuina atu. A maea ona iloilo ua faamalieina, ona tuu atu lea o suafa i luga o le lesitala ma o le a tuuina atu foi le lesitala i le Ofisa o le NPF, i le vaega e nafa ma i latou e i ai aafiaga tumau o le soifua, mo le faasafuaina.

O se aotelega lea lau afioga i le Fofoga Fetalai, aemaise foi le paia o le tatou Maota i le auga o lenei Tulafono. Ma lou faaaloalo.

FOFOGA FETALAI: Ua faamalo saunoa i lau afioga i le Minisita. O lea foi ua faafofoga le tatou Maota i lau saunoaga manino e faamalamalama ai le tatou Tulafono Tau Faaofi. Malo saunoa i lau afioga.

O le avanoa lenei i se tasi o sui usufono e fia saunoa i le tatou Tulafono Tau Faaofi. Ia tulai mai lau afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: Lau afioga i le Fofoga Fetalai, e tau fai atu nai manatu ia e maua ai foi nisi manatu. O le faatauaina o le Tulafono, a le afioga i le Minisita, e faafetai i lau afioga.

O le faamanuiaga e pei ona saunoa faamalamalama le Afioga i le Minisita, o faamanuiaga lea mo nai tagata ua aafia e i ai aafiaga tumau, e le gata i le tino ae faapea foi le mafaufau. Ia silasila la i le faigofie. O lea la ua matau atu, o lo o i ai foi le tupe lea ma le vaegatupe e faaagaga i le tatou Tala o le Tupe i le vaiaso lea, mo le polokalame lea, ae se i aulia lea vaiaso, ona toe fai atu lea o se tala i lena foi vaegatupe. Ae o le taimi nei ma le aso, o lea o lo o matauina, le vaegatupe e 2 miliona, o lea e i le tala faatatau o le tupe o lo o faagasolo nei, e faaiu i le masina lenei, e 2 miliona. Ia faafetai o lea ua aumai le Tulafono e faatulafonoina ai lenei mea, aua o lea la ua vaavaai atu, o lea sa tufatufa le 2 miliona lea i le tausaga faaletupe lenei, ae leai se Tulafono e faavae ai ma faatulafonoina ai. |O le mea lelei la ma le taua mo le agai i luma, o lea ua aumai le Tulafono. Ae manaomia se tatou lipoti pe na faafefea ona tufatufa le 2 miliona lea ua tufa i le tausaga faaletupe lenei, a o ai foi na tufa i ai? Aua o lea e matau atu, e leai se lesitala a tagata o i ai aafiaga tumau e fua i ai le tufa ma le seleni. O le vaega la lea, e tatau ona faamanino. Ona o lea e le o maua po o fea le Matagaluega lea sa faaaaoga, po o le NPF, po o se isi Matagaluega.

O le 2 o au fesili, po o fea e aumai ai le tupe lea o le a faaaoga i le polokalame lenei, o se tupe a le Malo po o se tupe a le aufaisaofaga a le NPF? Afai o se tupe mai o i le Ofisa o Tupe, e tatau ona faamanino, afai o le a faaaoga i ai tupe a tagata faigaluega o lo o totogi saofaga, e tatau foi ona aumai malamalama na vaega. Ae taua tele le mataupu.....

FOFOGA FETALAI: Ou te fia fesoasoani atu i le mataupu lau afioga i le Taitai o le Itu Agai. E manino lava le saunoaga a le Minisita, i faafofoga mai foi le aufaisaofaga, ua afaina atu a latou saofaga. A o lea na manino lava le folasaga a le Minisita e le aafia saofaga, a le aufaisaofaga a le NPF. E faapuupuua lava faapena.

Tofa Hon LAUOFO FONOTOE NUAFESILI PIERRE LAUOFO: E pei o le mafuaaga lena, o lea e faatali po o le a se tala, pe toe maua ni entitlements a nai tagata NPF ma tagata fai saofaga, ae se taimi ona tatou talanoa lea i lena vaega. Ae mo le taimi nei, ona o lea e talia se faaiuga a le tou Kapeneta ma le tatou NPF i na foi fuafuaga, po o fea o le a tatou agai i ai. Ae o le tulaga lea e pei ona i ai, e aumai tupe i o, tuu i i, i le NPF ona faatino loa lea o le polokalame lea ma fuafuaga ia. O le mea lena e tatau lava ona manino, aua e manino i faaupuga, ae o lea e le o manino po o fea tonu accounts e tuu ai nei tupe. Ae o se taimi saunoa faamalamalama le afioga i le Minisita, e taua tele, e taua tele le fesoasoani, e tatau ona tatou fesoasoani i nai o tatou tagata o lo o i ai aafiaga o le tino. O le aafiaga o le tino e faigofie, aua e faigofie lava ona tatou iloa le tagata ua logonoa, e faigofie ona tatou iloa le tagata tauaso, e faigofie ona tatou iloa le tagata pipili, ma isi ituaiga aafiaga tumau faapena. Ae le gata la i aafiaga o le tino, ae o lea foi ou te matau atu i le Tulafono Tau Faaofi, o lo o aafia ai ma aafiaga o le mafaufau, latou ia o lo o i ai aafiaga tumau o le mafaufau. E taua foi i latou. E taua foi ona ave i ai se fesoasoani mo i latou na, ae tatau ona manino, po o ai tonu e latou te taunuu ai ma taliaina le fesoasoani lea. Aua o lona uiga po o se isi o le aiga po o le a lava le tulaga o i ai.

E tatau ona mautinoa, o lo o faaaoga lelei ma faaaoga tatau e tagata lea e i ai aafiaga o le mafaufau, aua e pei o i latou ia, ua latou le malamalama i tulaga faapea. O le mea la lea i tulaga tau aafiaga tumau o le mafaufau e taua ai tele lipoti a fomai. E tasi lea vaega e tatau ona faatauaina o lipoti a le fomai. I le aafiaga tumau o le mafaufau, e manaomia se psychiatric doctor, ae pei lava e le o i ai se tatou fomai faapena i Samoa nei. O lea ou te iloa sa i ai si tamaitai tausi soifua psychiatric nurse sa i ai, ae ou te le iloa po o galuega lava iinei ia tatou. Ae e taua, aua o tulaga tau aafiaga o le mafaufau e le faigofie foi lea tulaga. E tatau lava ona tatou vaavaai aua e le natia le tulaga lea o lo o i ai, e toatele nai tagata ia o lo o matauina i le taulaga, o lo o nofonofo solo i le auala ma aisi i ni tupe. E foliga mai o aafia o latou mafaufau ae le o mautinoa, e tatau ona ave e fai lelei suesuega, pe agavaa foi i latou na i lenei fesoasoani. O nai tagata ia o lo o nofonofo i le auala, aemaise lava le taulaga, ma aisi tupe mai tagata o lo o feoai ma tagata faigaluega ma tagata o lo o fai faatau. E taua le vaega lea aua e tatau ona tatou tausia faalelei latou nei. Ae pau lava le mea ia suesue lelei e le fomai, ia le tulaga o i ai le mafaufau. Aua e foliga mai o lo o aafia i se aafiaga tumau le mafaufau, ae o la e iloa aisi tupe, o la e iloa le taua o le tupe ma le aoga o le tupe. E faapena foi i isi faleoloa super maketi ia, e le o na ma le laina, o lea lava tatou te iloa. O lea ou te alu au e faatau i faleoloa, nofonofo ai luma nai uso ma nai toelaiina, e omai aisi mai. O ai nai seleni, sisipeni e totoe i le taga mai le faatau, e tuu i ai, ae i ai isi taimi e manava i le afiafi, toe afe i le super maketi, ia la ua nofonofo mai luma o le faleoloa ma le fagupia, o la e taumafai mai lana fagupia. O le taua lena e tatau ona suesue lelei aua e pei e

foliga mai o lo o aafia le tulaga o le mafaufau, ae o la e silafia lelei le faaaogaina o le seleni, ma le taumafa o lana pia. Aua ou te le iloa la i le Minisita pe agavaa uma tagata ia i lau polokalame lea pei ona faatu mai nei.

Aua e taua ia vaega ia, aua o le isi itu e taua ai, e talitonu o le polokalame faapea, a lelei ona faatino ona tatou le toe vaaia lea o nai tagata nei i luga o le aualatele o aisi ai, ae tausi faalelei e o latou aiga. O tagata lava ia o lo o i ai aafiaga tumau i le mafaufau i le mea lea ou te matauina e au ia i atunuu i fafo, e fai lelei mo shelter e tuu ai, mo shelter e tausi ai ma vaaia faalelei. Ona e i ai tulaga tau fomai e manaomia, e pei o fualaau ma vailaau e faaoga e fesoasoani i le tulaga o lo o aafia ai i latou. O polokalame la ia o lea ua ou matau, o lea ua tatou agai atu i ai i nai polokalame faapea mo le tausiga o tulaga lea o tagata faapea o aafia i totonu lo tatou atunuu. Ia e foia ai foi le tele o isi faafitauli tau social problems. Aua e i ai isi tagata o lo o aafia le mafaufau, ona e i ai taimi e oo i le tulaga ua matua violent lava, ua matua oo i le tulaga ua le mafai ona taofiofi.

O lea foi sa i ai mea sa tutupu mai ia vaitau i se tasi foi o taulealea na ave i uta i le falepuipui i Tafaigata, ae tulai mai ai le faalavelave. Ona e leai se shelter po o se nofoaga e ave i ai nai tagata faapea e faatino ai latou treatment ma tulaga e fesoasoani faapena. Ae o le manaia ia o le polokalame a lau afioga i le Minisita, po o lea o le a tatou faasolosolo atu lava i nai fesoasoani faapea, i nai tagata foi ia pei foi o nai tina ua maliliu o latou aiga, ae tausi ai latou ma latou fanau. Ona faasolosolo atu lava i tagata e leai ni galuega, ma fai atu ai foi ma nisi fesoasoani po o unemployment benefit. Ia silasila i le manaia o le faasolosologa. Aua o lea na amata mai lava i nai tagata matutua nai senior citizens foi ia, lea foi e maua le latou fesoasoani. E taua tele ia fesoasoani, e taua ma e aoga mo le tausiga o tagata. O tatou e i ai le tatou responsibility mo le tausiga o tagata faapea o le tatou atunuu, e tataua ona tatou vaaia faalelei, tausi faalelei, ma ave i ai le fesoasoani, ae faamalo faafetai.

Ia faamalo i lau afioga i le Fofoga Fetalai, o nai motugaafa ma nai manatu laiti na, e amata ai lenei Tulafono Tau Faaofi, faafetai mo le avanoa.

FOFOGA FETALAI: Ia malo saunoa, ia manatua e saunoa loa le Taitai o le Itu Agai, o finagalo uma lava na o lena Itu o le Maota. O lea ua aumai e lau afioga i le Taitai, e talitonu foi la, ua leai se toe masalosalo i le tatou Tulafono.

Malie lau afioga, se i tuu atu le avanoa o la e fia saunoa mai le Minisita, ona tuu atu lea o le avanoa i lau afioga i le sui usufono mamalu.

Afioga Hon Mulipola Anarosa Ale Molioo: Faafetai i lau afioga i le Fofoga Fetalai mo le avanoa. E pei o le mea lena ua ou tulai atu ai, e pei o lea ua ta tamua le afioga i le Taitai o le Itu Agai o le tualuga foi lea o finagalo ma manatu. Ae o le taua o le saunoaga a le Taitai o le Itu Agai, e

fesili lava, toe tali lava ia i ana fesili. Ae taua le faamalamalama atu e pei ona faafesili foi i le tulaga lea. Ne i te i ua galo i le tatou Maota o le Palemene, o le tatou paketi muamua, lea na i ai i totonu faamanuiaga ia, a e o lo o i ai manaoga tumau. O totonu o le tatou Matagaluega o Tina ma Tamaitai o i ina o lo o ave i ai ma fau ai le lesitala, ona faatino loa lea e le Matagaluega o Tupe. O le tatou Tulafono lea ua i ai i le taimi lenei, o lea e taumafai e faaoga le system a le NPF, e pei ona i ai foi le tatou penisione, o i lea o lo o faamatuu atu i ai, o facilities ia a le NPF. Ae saolele lava le saunoaga. O le penisione, 65 tausaga, e okomeki lava ona mautinoa agavaa tagata ia. Ae o le vaega lea o manaoga tumau, e fai sina lautele, ae fuafua foi i le sailiiliga ma le iloiloga e pei o le mea lea e faataua ai le lipoti a le fomai. Mo le silafia e le tatou Palemene, e toatasi lava le tatou fomai faapitoa i le tulaga i le mafaufau. Ae pei na outou faafofoga mai, o isi ia o aiaiga e taua tele le lipoti a le fomai. E pei o se tali vave atu lena e tusa ma fesili ua tuuina mai. Ma le faaaloalo lau afioga i le Fofoga Fetalai.

FOFOGA FETALAI: Ia malo, atonu o lea ua manino le faafofoga a le Taitai o le Itu Agai e tusa ma mea sa laga i lona finagalo.

Tofa Hon LAUOFO FONOTOE NUAFESILI PIERRE LAUOFO: Lau afioga, ia ua lava ia lea manino, faafetai lava.

FOFOGA FETALAI: O le a la sou finagalo, ua lava oe e fai ma sui....onosai mai lava se i tuu atu le avanoa i le Minisita.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese): Lau afioga i le Fofoga Fetalai, e fesoasoani atu foi i le tatou mataupu. E matauina lava mai le aso muamua o le tatou fonotaga ma felafolafoaiga i Tulafono, e pei lava e tamua lava le Taitai o le Itu Agai. Ma ou te vaai atu lava, o saunoaga uma a le Itu Agai o lea e momoli i lana Itu Agai, ia ona toe repeat, ma toe fai uma mai lava. Ae pei e manaia ua lava le tulaga lena, ua lava le Taitai o le Itu Agai e saunoa, pe a faapea o le faiga lea.

FOFOGA FETALAI: O le tulaga lava lena faa-Palemene, aua o le mea moni lava ia, e saunoa loa le Taitai o le Itu Agai ia ua maea lena itu. Ae leaga lava le mea faigata o le vaai atu, ma alofa atu.

Tofa Hon LAUOFO FONOTOE NUAFESILI PIERRE LAUOFO: Lau afioga i le Fofoga Fetalai, ua ou tulai, ona ua ou nofonono lava ma vaai atu e leai se sui e tulai, o lea la na ou tulai i luga e fai nai manatu, e faaoga ai le tatou taimi. O lea la ou te vaai atu ua ta le 12....

FOFOGA FETALAI: E mo le silafia e lau afioga i le Taitai o le Itu Agai, e le o se mea e faaaoga taimi le mea lea o finagalo faaalua, ae ua lava lea. O lea ua ou tatala atua le avanoa....

Tofa Hon LAUOFO FONOTOE NUAFESILI PIERRE LAUOFO: E leai, ua mafua ona ou tulai e faaaoga le taimi, aua o lea na amata i le taeao i lou toatamai, i le le faaaogaina o le taimi. O lea la ua ou tulai se i faaaoga le taimi,ia vaai la ua mumu mai le moli a le afioga i le Igoamatua.

FOFOGA FETALAI: Ua lelei o lea ua saunoa mai lau afioga le Tamaitai Palemia

Afioga Hon Fiafe Naomi Mataafa (Palemia): E pei o lea e matau atu i le saunoa mai a le Taitai o le Itu Agai, fai mai o oe na e toatamai i le taeao. E faamolemole le tatou Maota, e le o le itu lena i la matou faalogologo atu, e na o le faaaliga a le Fofoga Fetalai. A faapea la e leai ni fesili, aemaise lava le itu e agaia le Malo, ia o le mea ua tupu, ae leai se mea o le a toatamai ai fua le Fofoga Fetalai, o la e fai lana ia galuega. Ma e matou te fiasia foi, o lea ua faaauai ai galuega a le Malo, e pei ona taatia i tatou pepa o galuega. O lau soso atu lea ma le faaaloalo i le Nofoa i le Taitai o le Itu Agai.

FOFOGA FETALAI: E masalo o lea ua manino lau afioga i le Taitai o le Itu Agai. Ou te le i ita i le taeao, o le faasilasilaga taua mo le lumanai o le Palemene. Ia tulai mai le sui o Aleipata Itupa i luga.

Tofa Hon LAUOFO FONOTOE NUAFESILI PIERRE LAUOFO: Lau afioga i le Fofoga Fetalai, e pei o le tulaga lena, o lau lava ia talanoa e matauina le tulaga sa amata ai le tatou taeao. Ona o lau lava vaai i le Tulafono Tumau, e le faapea na o le matou itu e agavaa i fesili. O la foi sa ou sau au ma lou manatu, ai e i ai ni fesili a le la Itu agai i latou Minisita. E leai, o lea ou te matau o lea e manino le Tulafono Tumau, e le na o le matou Itu e fesili. Ae o lea la sa ou faalogo atu i le taeao, e pei lava e agai mai lau afioga i le matou Itu, ae leai. E pei o le tulaga lea o lea e faamanino atu lau afioga.

FOFOGA FETALAI: E lelei le faasao atu lau afioga i le Taitai o le Itu Agai. O sui o lena Itu ma so o se sui usufono. E manino lava le folasaga a le Fofoga Fetalai, e le taitai faanenefu se tala a le Fofoga Fetalai. O le mea lea, malie ia.

Tofa Ale Vena Ale: Lau afioga i le Fofoga Fetalai, malie lava lou finagalo, ua ou manatu ua solifono tele le Taitai o le Itu Agai. O lea ua uma ona e saunoa, e tuu le avanoa i le sui usufono o Aleipata Itupa i luga, ae o lea lava

e.... o lea foi ou te fia tautala au i le Tulafono faamolemole lau afioga, maua se avanoa.

FOFOGA FETALAI: E sao lelei lava le saunoaga, e leaga lava le mea e leaga o le faaaloalo ma le manatu atu. O le mea lea, malie ia le sui usufono mo Aleipata Itupa i luga, o lou avanoa sao lenei.

Afioga FUAAVA SULUIMALO AMATAGA: E faafetai lava o lea ua toe maua le avanoa. Ona o lea ua maua, e faapea a saunoa loa le Taitai o le Itu Agai, a lea foi...o lea ua saunoa foi le tama matua ia Ale, o lea foi e le i saunoa le taitai o le isi itu agai. O lona uiga o lea lava e maua le avanoa i totonu i i, o matou nei i le va lea.

Tofa Ale Vena Ale: Lau afioga i le Fofoga Fetalai, o le mea e fia faasao. O lea ua uma ona saunoa le Fofoga Fetalai, e leai ni vaega, seiloga e tovalu, o tatou uma lava o le Itu Agai, e le faapea e taitai au i se vaega. O le mea lea, tau tuutuu lelei saunoaga i le mea e tatau ona taoto i ai.

Afioga FUAAVA SULUIMALO AMATAGA: Ia faafetai tama matua, e leai o le tatou vaega lava lea. Ou te iloa o lea na tamua le matou taitai, ae pei o lea e totoe ai le masaga ma le la tama. O lea la e taumafai atu ai se faatauvaai foi o le usugafono a lenei itumalo, e tusa ma le tatou Tulafono lea ua opea i le Maota. E faamalulu atu lau afioga ona ou te le i auai i le pre-sitting, e tau maua ai foi ni manatu po o a ni mataupu sa laga i le faatalanoaga muamua o le tatou Tulafono. Ae pei o le mea taua i lau faitau i ai, ona e toatele nisi o si o matou itumalo, sa tatalo mai lava ma aumai foi e sui pulenuu aemaise foi sui o tamaitai. O i latou o maua i le tulaga o manaoga faapitoa, aua o le faaupuga na oo atu sa taumafai mai i ai. Ua faapea mai le Matagaluega e na o na fananau mai o lo o i ai manaoga faapitoa. E pei la o e e faananau mai e faaletonu le mafaufau, po o le disable. E i ai le tulaga o le tauaso, ma le pipili ae pei sa taumafai lava i ai, ona e i ai isi tagata. I se taimi mulimuli ane o le olaga, ae toe maua ai i tulaga o manaoga faapitoa lea, e i ai i latou ua feoai i wheelchair faapea na lavevea i taavale po o ni galuega ma mea faapena. Ae o lea ou te iloa ua taua le tulaga lea ua aumai i le Tulafono lea. O lea ua define lelei mai lava i latou ia e entitle i faamanuiaga nei, o aafiaga tumau o le tino, o le mafaufau po o le le atoatoa lelei o le malosi o le tino ma le mafaufau ma tulaga uma faapea.

E i ai nisi o lou itumalo ua maua i le tulaga foi lea ua bedridden, o lo o gasolo atu pea ia tamaitai foi tausi soifua ma faatino le galuega, tai pei o le mai lea o le stroke, ua le mafai ma o le tele ia o le taimi e alu ai i le tausiga. I le vaavaaia, tausiga aemaise foi o le galuega o lo o faatino e le falemai tausi soifua, o mea foi ia o le suiga o mea ia o lo o faaalu ai le otaota o le tino, ma tulaga faapena. E pei o nai tagata ia sa taumafai mai ai. O lo o i ai foi tagata

foi ia, na soifua mai lava ma feola ane, o la e atoatoa le tino ma le mafaufau, ae pei ua alu lava te i ua maua i le mea foi lele ua filemu, a e talanoa atu ai ua le tautala. Ua maua i le mea foi lele pei ua logonoa, ua tau le tapasaina le mea e agai i ai. E tasi ia tagata e pei ona maua foi i le saunoaga a le Tamaitai Minisita. O lo o i ai a tatou fomai ma falemai foi e nafa ma le verify ina o nai tagata nei, aemaise i latou nei, ua tau le mafai ona...e fiu e faatalanoa, ae pei ua silaloa ma logonoa, ae ua i ai lava faaletonu i o latou mafaufau.

E matauina tulaga ia ia latou galuega faatino ma tulaga faapena aemaise o tagata ia, aemaise lava le mai lea o le stroke. Aua ua le mafai ai ona toe gaoioi, ae o le tele o le tausiga o lo o nafa ma nai aiga.

Ae tele le taua o le saunoaga a le Tamaitai Minisita, e mafai ona apalai mai le o lo o tausia, ma fai lelei mai le verification i faafeagaiga a nuu aemaise o sui tamaitai ma pulenuu. Ina ia mafai ai ona entitle nai tagata. Aua o le taimi nei e le o maua lava ni entitlements ia, ae o le tulaga lena, e pei ona toe fesiligia, ae faapea mai o le tala mai le Matagaluega, e na o e na soifua mai o lo o i ai manaoga faapitoa ia. Ae faafetai i le Tulafono lea ua tuuina mai i le tulaga lea. O le isi tulaga e taua ai le tulaga lea, aemaise le mai lea o le le atoatoa o le mafaufau. E taua atonu e le o maua nisi o le tatou soifua maloloina, fomai faapitoa e mafai ona faia ia suesuega ia, verification. Aua e pei ona saunoa le matou Taitai, e toatele lea ua i ai i totonu o le taulaga, a tou silasila i ai o luma o bank, po o luma o supermarket, ua fai e pei o se latou galuega, pei se latou employment, o le usu mai lava i le taeao, ua fai ai le tulaga lea o le aisi i se seleni, sau seleni ma au. O le mea lena ua matauina. O le toatele foi o isi tagata ta te malamalama lelei i ai i o latou aiga ma lo latou faasinomaga. Ae i ai la le mea foi lele, ua feololo nai seleni, ua fai faatauga, ua alu i le fale. Ia faafetai o na e alu aoga. Ae i ai foi isi, e maua atu o le suavai lava o le ava la e faaoga i ai.

A o se tuualalo a lenei itumalo, se i mataitu tulaga ia, pe afai e fai assessment i ituaiga manaoga faapitoa lea. Ia mautinoa e moni ma faamaoni o lo o le o atoatoa ia le mafaufau, se i tulou. Ae le o se mea ua pei, e ese lava le tulaga o le employment, aua e toatele tagata o le lalolagi ua latou faia le galuega. Aua a outou sailiili lava, o lou iloa o Peretania ma Initia e i ai milionea, na o le aisi lava lana mea sa fai. O le sailiili lea i ai, e i ai tagata faapea, e tele a latou aseta, fale tetele ma tulaga uma faapena, e maua mai i le aisi. A o le tulaga lena i le faiga o le ituaiga galuega lea, o mea foi ia o de desolidification. E oo lava i le taimi e fai ai le galuega, laei lelei i laei o le tagata mativa, tagata e aisi, a maea foi ua manava, ona toe alu foi laia, e tetele lava aseta ma fale ma tulaga uma faapena e maua e nei tagata. Ne i te i ua alu ai alu ai, le tatou Tulafono, silafia foi e nisi o le tatou atunuu o lea e maua nai faamanuiaga faapea, ona ese foi lea o le taimi e alu ai le galuega o le aisi ma tulaga uma faapena. Ae tataua lava ona faamautinoa ae le i faia le

assessment ona fai ai lea o le lesitala. Ia mautinoa ia pau tonu lava faamanuiaga, mo i latou o i ai manaoga faapitoa ia. Ma le agaga faaaloalo.

O se tuualalo lea a lo matou itumalo mo le tatou Tulafono o lo o faatalanoaina nei. Manuia le tatou Fono, faafetai.

FOFOGA FETALAI: Ia malo faafetai mo le faaso. Ia tulai mai le sui usufono mo Aana Alofi 2.

Afioga AIONO TILE GAFA (Aana Alofi 2): Ia faafetai i lau afioga i le Fofoga Fetalai mo le avanoa. Ia malo foi le topule ma tapule i lau afioga aua le faasoaina o avanoa mo le fono. E faafetai foi i le paia o le Maota aua le tatou galuega.

E laititi lava sau fesili, e muamua ona momoli atu le agaga faafetai i le Minisita ma le Tulafono ua faatulai mai, soalaupule foi ma tatou talanoaina. O le agaga faafetai o le amanaia, o le amanaia o tatou tagata e i ai tulaga ia. E i ai se alo ma se fanau a lenei aiga o lo o aafia i tulaga ia. Ma o se agaga faakerisiano, mea moni lava. Na sau le isi faifeau matou failotu, ae sa ia molimauina le afafine lea i le matou aiga. Na fai mai lana saunoaga, “Aiono, pau lea o le tagata ua mautinoa lona avanoa i le lagi, o le afafine lea. Na fanau mai loa, pau lea o le tagata ua matua mautinoa lona avanoa i le Malo e faavavau.” Sa lagona lava le agaga faafetai i lea foi tala, saunoaga a le faifeau. O le agaga fiafia lena lau afioga i le Minisita. E pei ona fai atu, o le amanaia o nai nei tagata, o tagata uma lava na faia e le Atua, e pau lava le eseese ona o faaletonu.

O lau fesili e pei ona ou tulai atu ai lau afioga i le Fofoga Fetalai, o lea e matau atu e faatulaga faatapulaa le tulaga o le matua, e 64. Ae pei ona saunoa nisi o sui usufono, i le tatou matau i le tatou atunuu, ou te iloa o le toatele o tagata ia ua matauina ua ova ma le 64 tausaga. Pe i ai sina fetuunaiga aua tausaga o tatou tagata ia, ona o lea e matau atu, e pei ona faatulai mai le Tulafono, ina ia faagata i le 64, ae o le mea moni lava lena. E toatele lava tagata ia ta te matauina ua matutua nai tagata, out e iloa foi e leai lava se isi mea o le o lava. O le isi tagata e pei e faataga faavalevalea tulou, ae fai lava ona o le manao i le tupe.

E pei ona saunoa nisi o sui usufono e lagolagoina foi i le tulai atu, e lelei lava ona fai lelei ia sailiiliga ma suesuega faafomai, ina ia mautinoa tulaga ia aua le faaso aua faamanuiaga mo i latou. E pau lea lau afioga i le Fofoga Fetalai, ae momoli atu le faafetai, e lagolagoina le Tulafono. Ia manuia le fono.

FOFOGA FETALAI: Ia faamalo le faaso, saunoa ma faufautua foi aua le tatou Tulafono Tau Faaofi. A o le i tulai mai lau afioga i le Igoamatua, se i tuu atu le avanoa i le Minisita o Tina ma Tamaitai.

Afioga Hon Leota Laki Lamositele: Ia faafetai mo le avanoa lau Afioga i le Fofoga Fetalai, e na o sina faamalamalama laititi e tusa ma le saunoaga a le sui usufono mo Aleipata. Ona o lea sa faapea o le tulaga lea o i latou o lo o lesitala i lalo o le vaega lea o le aafiaga tumau. Mo le silafia foi e le mamalu o le tatou Maota, o le upu lea o lea ua faaoga nei, o le aafiaga tumau, ae le o le manaoga faapitoa.

O lea sa faapea mai e na o i latou na fananau mai loa ona agavaa lea i le vaega lea. Ua leva ona taatia i totonu i le faagasolo a le Matagaluega, i latou polokalame mo fesoasoani i aafiaga tumau, ia le vaega lea i le polokalame fesoasoani lea, e auala atu i nisi o Faalapotopotoga, e pei o le NOLA, Loto Taumafai, o lo o fai ai galuega fesoasoani a Tina ma Tamaitai.

Ua leva foi ona...sa faataatitia ai le alafua lea o lo o faatino nei e le Matagaluega po o fea tonu le vaega, le tagata e aafia i le mea lea o le aafiaga tumau. O le faatinoga o le faiga o le iloiloga lea, e fuafua i luga o le tuga o lo o taatia ai, ona maua ai lea o le latou faaiuga e mafai ai ona classify le tagata lea i le aafiaga tumau. Ona faapena foi lea ona iloa ai po o a ia polokalame fesoasoani e mafai ona fesoasoani atu i ai.

Ae na aumai loa i totonu le finagalo o le Malo e fesoasoani i ai i le tai \$100 lea ua amata i le masina. E pei o i ina na amata ai loa ona taumafai e faalautele atu le talaina o le polokalame lea, ina ia mafai ona agavaa i ai nisi o le atunuu o lo o mafai ona latou maua lea fesoasoani. E pei o le mea la lenei o le taumafaiga a le Matagaluega, ina ia avatu le faamatalaga lea i tua i alalafaga i tua, e auala atu i sui o nuu ma sui tamaitai. Ma o le taimi nei, o lo o faapena ona faasolosolo mai i totonu ia i latou. E pei ona taua e le Minisita o Tupe, i lana folasaga, ua ova ma le 2000 le aofai o i latou ua lesitala i le polokalame lea. O lona uiga o la lava e faatuputupulaia le faagasologa atu o lesitala o i latou, e pei foi ona taua o lo o i ai mea e manaomia, ia faaatoatoa le lesitala o i latou o lo o lavevea i le polokalame.

A o le mea taua foi o le mea lea o le iloiloga a le fomai, ina ia fesoasoani i ai i le faatinoga o le galuega. E pei o se faamatalaga lenei ina ia mafai ai ona faamalamalama atili le vaega e pei ona saunoa i ai sui usufono. O lea foi e faalogologo mai o le 64 lea e faagata ai, aua e onolima loa le tagata, okomeki le alu i le polokalame lea o le au penisione. Ona lavevea ai uma loa lea i si auaunaga la e i ai. O lona uiga o la e faaauau atu lava la le tatou fesoasoani lea pe a maea le onofa, ona faaauau ai loa, pe a faapea o la ua 65 ou tausaga. O toe soso atu lea i le mamalu o le Moata.

FOFOGA FETALAI: Ia malo faafetai. Ia se i toe tulai mai le sui usufono mo Aleipata.

Afioga Fuaava Suluimalo Amataga: E momoli atu le agaga faafetai i le afioga i le Minisita e tusa ma le faamaninoga o le Tulafono, e pei ona avatu ai foi se lagona o lenei itumalo. Ia faafetai o lea ua faamanino mai tulaga ia,

atonu foi o lo o faafofoga mai ia sui tamaitai ma pulenuu o nuu o si o matou itumalo. O le tulaga lava lea sa faatalanoaina ae faapea o le faamalamalamaga lea a le Matagaluega na o i latou na soifua mai o lo o i ai manaoga faapitoa ia, a o latou foi ua toe mamai atu ae sa malolosi lava, e pei o lea ua taua mai, o le a faagasolo. Afai foi o faafofoga mai sui ia o matou itumalo ma pulenuu, ia tapena mai uma loa lipoti a le falemai ma tulaga faapena e faagaoioi le lesitala. Ae na o se tulaga e pei ona e saunoa i le 65 ma le 64 lea e gata ai le tatou penefiti i aafiaga tumau. Ae onolima loa entitle i penefiti, ae le faapea e...o le definition o le aafiaga tumau, lona uiga e tau lava i le valaau a le Atua o lo o tumau lava. E pei foi lele e oo atu loa i le 65, te i lea ua toe malosi, ona o faatasi lea ma penefiti a le au malolosi. O le a le mea e le faaauau ai lava? Se i fai mai le finagalo o le Atua ae faaauau lava le tatou tautau lea. E tusa la on top o le penefiti o le 65, ia i ai ma le penefiti lea o aafiaga tumau. E leaga o lea ua tuu ai le upu tumau, ae pei ua aveese le faapitoa. Afai loa e tumau, ia seiloga e valaau le Atua o lo o tumau lava. Ma le agaga faaaloalo faafetai.

FOFOGA FETALAI: Ia malo le faatupumanatu foi i le Minisita ma le Matagaluega. Tulai mai lau afioga i le Minisita.

Susuga Hon Laauli Leuatea Polataivao: Ioe, lau Afioga i le Fofoga Fetalai. E manatu o lea ua manino le faamalamalamaga a le Minisita e a ia le Tulafono, manino foi le faamalamalamaga i le tulai mai o le Minisita na amataina le tatou lesitala. E pau lava le mea na ou manatu e faamalamalama atili, ona e tasi lenei manulauti tauave ina ua finau le tatou faiga palota. A aumai le faatuatua a Samoa i le Faatuatua i le Atua Samoa ua Tasi, o le mea lea e fai. O le a fai le faamanuiaga faapitoa mo tagata o lo o i ai manaoga tumau. O lea la ua fai le Tulafono, o lea ua amata ona taupule.

Ae o le mea lea faapea, na saunoa i ai manatu ina ia malamalama le atunuu ona o lea e faafofoga mai, pe na faapefea ona faaso le miliona lea na pasi i le tala o le tupe. Ou te manatu e tataua pea ona faamalamalama e le Minisita o Tina ma Tamaitai, o lo o i lalo o lana Matagaluega aiaiga faauletulafono sa faaso ai le tupe lea. A o lea la faatoa aumai e le Minisita o le NPF, e faaoga ai le system a le NPF, e ave ai i tua e pei o le faasoaga o le tatou penisione. O le mea lena e tataua ona faamalamalama leaga o lea na fesili le Taitai o le Itu Agai, e pei e foliga mai le faaupuga e le faatulafonoina, le tufatufaina o le uluai lua miliona o lea na aumai e amata ai le poloketi. Ae faafetai o lea e matau atu i le taeao lena, e ui lava ina outou tetee i le faaupuga e fai le penisione mo tagata e i ai manaoga tumau, ae faafetai o lea ua manaia lena taeao o lea ua outou saunoa mai e lagolago le Tulafono.

O le ala lea o lou toe tulai atu e faamalamalama atili le mataupu a le Afioga i le Minisita o Tina ma Tamaitai, ma le Afioga i le Minisita o le NPF e ana le system lea o le a tatou faaogaina.

FOFOGA FETALAI: Malo faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai ona o lea ua...

FOFOGA FETALAI: Ia, e i ai se mea o toe faanenefu?

Tofa Hon Lauofo Fonotoe Nuafesili Pierre Lauofo: Ia o le a foi le mataupu lea ua tau mai au...

FOFOGA FETALAI: O nenefu la po o lena e malamalama?

Tofa Hon Lauofo Fonotoe Nuafesili Pierre Lauofo: Leai, o le mea lea e fia faamalamalama le fesili, leaga o lea tali mai le Minisita o Faatoaga i le mataupu a le Minisita o Tina ma Tamaitai, lea sa ou fesili ona o le Tulafono o lea e aumai i lalo o le NPF, o le Tulafono a le Afioga i le Minisita o Tupe. A o lea foi la ua faamalamalama mai e le Minisita o Faatoaga, ae faigofie lava le fesili.

O le \$2 miliona lea sa tufatufa nei ma faaaoga nei i le Tala Faaletupe lenei, o lea e leai se Tulafono ona e agai tonu lava le fesili, ona o lea faatoa aumai le Tulafono. O lea la e mafua ai ona ou taua le vaega lea, ona e foliga mai la e leai se Tulafono na tufatufaina ai le \$2 miliona lea na tufa i le Tala Faaletupe lenei. Ia, aua o lea foi la ou te vaai atu i le Tulafono Tau Faaofi lea e aumai, e le o i ai se tulaga foi lele e faamalosia ai agai i tua po o le retrospective application ina ia faatulafonoina ai le \$2 miliona lea ua faaaoga i le tausaga faaletupe lenei. E faigofie lava la le tulaga o i ai. Ia faafetai.

FOFOGA FETALAI: Ia, o lea ua maua atu le finagalo o lau Afioga i le Taitai o le Itu Agai. O le mea muamua, sa e saofai foi i le Kapeneta, o le collective responsibility a le Kapeneta pei e felagolagomai i tulaga faapea e pei ona tali le tasi o Minisita. Ia o la e foi ua tali manino mai Afioga i Minisita, o le tupe lea na faaagaga o le tupe na pasia i le Tala o le Tupe. Ia vaai, o le Tulafono o le Tala o le Tupe a pasia loa o le Tulafono, ina ia manino.

Ia, se i tulai mai lau Afioga i le Minisita.

Susuga Hon Laauli Leuatea Polataivao Fosi: Ioe lau Afioga, ou te musu e faatauta ma le Taitai o le Itu Agai e tumu i le faaaloalo, ae o la e na te iloa lava, e pasi loa le paketi a le Palemene, \$2 miliona i totonu i i, ia o la e i ai le pule atoatoa i o i le Matagaluega o Tina ma Tamaitai e fai ai ana faiga faavae ia te ia lava, a o lea ua aumai le Tulafono. E le i fesiligia atu foi le tufatufaga o le tai \$50 lea na tufa nei i le faiga o le tatou ID lea na fai nei. E

leai lava ma se fesili atu. Aisea? E puipui i le sese sa fai. Ia o le ala lena o le faamanatu atu.

FOFOGA FETALAI: Ia, atonu o lea ua manino.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leai leaga o lea pei ua agai fua tau le \$50 ia o le tatou ID lea ua lagolagoina uma e le Maota le taua o lena galuega tele. O le \$50 lea e manino na aumai lalo o le stimulus package i le vaitaimi o le SOE, State of Emergency, e le toe taua ai ni Tulafono ona o le SOE e faavae mai lalo o le Tulafono Faavae po o le Constitution.

FOFOGA FETALAI: Ia, o lea ua manino.

Tofa Hon Lauofo Fonotoe Nuafesili Pierre Lauofo: A o le Tulafono lea o le NPF, e sao, sao. Faafetai i lau Afioga i le faamalamalamaga. O le Tala o le Tupe, o le Tulafono, Appropriation Act, Tulafono, pasia, pasia le tupe e faaaoga. A o le tufatufaina ma le faaaogaina, o lalo la o le Tulafono lea a le NPF faatoa aumai. E le o i ai la se Tulafono aua o lea e le i pasia le Tulafono Teuteu lea e aumai. O le eseese lena. Lau Afioga, faafetai.

FOFOGA FETALAI: Ia, ne i tatou finau i ia mea ma umi ai le tatou Fono, a o lo o manino lava, o a uma lava Tala o le Tupe e pasia i le Tulafono o le Tala o le Tupe, ua i ai le malosiaga e faatino ai ma faagaoioi ai galuega, so o se galuega a le Malo.

Tulai mai lau Afioga i le sui usufono mo Faleata 4.

Tofa ALE VENA ALE: Faafetai i lau Afioga i le Fofoga Fetalai ua maua foi se avanoa o lenei usugafono e tusa ai ma le tatou Tulafono ua i lumamea nei o le Palemene. Ia, lau Afioga i le Fofog Fetalai, ou te momoli atu le agaga faafetai i lau Afioga i le Minisita o Tupe ma le Minisita foi e ou le Tulafono lenei, ona o lea ua matauina le faatauina o tatou tagata nei e i ai aafiaga tumau faapitoa lau Afioga i le Fofoga Fetalai. A matau atu i atunuu tetele o le lalolagi e i ai Niu Sila, Ausetalia, Amerika, o ituaiga tagata nei e matua amanaia lava e faigamalo ma ave i ai le faamuamua ma fausia mea e nonofo ai ma tausi. Faafetai i le tatou faigamalo, lau Afioga i le Tamaitai Palemia ma le Kapeneta ua faatulai mai le... Atonu o le mea lea sa saunoa i ai le Minisita o Faatoaga lea foi ua toe tulai atu ai le Taitai o le matou itu, ia atonu ona o lea sa faamanino mai o le folafolaga lea sa fai e le Vaega Faaupufai a le FAST lea ua faataunuu, atonu o le itu tonu lena o lea na agai i ai lona finagalo. A o le agaga maualuga lau Afioga i le Fofoga Fetalai, ou te momoli atu le... E toatele tagata o lou itumalo e i ai aafiaga tumau faapitoa lau Afioga ma le faaaloalo lava.

Ou te momoli atu le agaga faafetai i le tatou Malo. Ua 40 tausaga foi tausaga o le matou faigamalo e leai lava se mea faapea. Ioe. Ae faafetai. Faafetai ua outou amanaia.

A o le agaga la o lou tulai atu lau Afioga, silasila lelei i le faataotoga o tulaga i le mataupu lenei. Ma e i ai le manatu lau Afioga i le Fofoga Fetalai, lau Afioga i le Tamaitai Palemia ma le Kapeneta, tatou silasila mamao. I should think foi lele e tatau ona i ai se falemai, disability hospital mo tagata nei. A faapea e alofagia e le Atua ae toe tu mai le tou faigamalo, o le picture lena e tatau ona outou silaila i ai, ona ou fai atu lea ia outou tou te le faiaina i se palota. O le agaga la o le tuualalo atu a le sui usufono lenei o Faleata 4, ia silasila mamao le tatou faigamalo i tagata nei.

O lona lua, aua ne i aafia le penisione pe a faapea ua e aulia lou 65. You can be entitled to your pension as a disable toe maua foi ma lau penisione tagata matutua. O le a le mea o le a aveese ai fua? O le a le mea o le a aveese ai fua? No, it's a must. Lau Afioga o le fautuaga lena, aua leaga e te le mafai ona see le tagata lea ma'i e take le faamanuiaga lea o le tagata matua ae aveese lana faamanuiaga lea o le tagata mai. No, e le mafai, e entitle uma lava i mea ia e lua. O le fautuaga lena i le tatou Tulafono meamanu o lea ua fai le Tulafono, toe tuu i ai le mea lena ae le i pasia le mea lea. Aua a pasia nei, o lona uiga, e le mafai e le tagata lea o le a 65 tausaga ona entitle i lona pension mai a o la ua uma ona i ai. O le fautuaga lena i lau Afioga. O le fautuaga muamua, ia silasila mamao, aua e faatupulaia tagata e soifua mai e maua i mai ia o le tino ma se i faatulaga lelei aua e i ai lava gasegase foi nei e mafai lava ona tausii e le aiga. Ia o la e i ai le caretaker, resitala lelei, make sure e vaai lelei ana faamanuiaga o la e tausii lelei. Ia, e tatau foi ona totogi ma le tagata la e tausii, silasila i ai, aua e le mafai ona fai le galuega a le tagata lea ae le maua foi sana ia faamanuiaga.

Ia lau Afioga i le Fofoga Fetalai, pei o nai...

Afioga Alaiasa Moefaauouo Malagaitutogiai Sepulona Moananu: Lau Afioga i le Fofoga Fetalai...

FOFOGA FETALAI: Ia malie le sui usufono mamalu se i tuu atu le avanoa i le sui usufono mamalu mo Anoamaa 1, i le faauilavea.

Afioga Alaiasa Moefaauouo Malagaitutogiai Sepulona Moananu: Ia o lea ua lamalama faaiu le saunoaga a le sui usufono mamalu, ae i ai lava nai ana lafoga ia sa saunoa i ai e fia faasao e faapea ua 40 tausaga le vaega lenei e le i faia se mea. A o le mea sao lava ia, o lea lava sa mafaufau foi i ai le vaega e fai, a o ia na o le 39 tausaga aua o lea ua alu ese ua leva lava ona faamavae ma le vaega ae le tatau ona toe faia e ia le tala e aafia ai fua le vaega autu lea e i ai.

E pei o le faasaoga lea ne i te i ua matau sese mai le atunuu. E leai, sa mafaufau foi i ai le matou vaega i le tulaga lea, ae pau lava ua le manuia i le faiga palota. Ia ma le agaga faaaloalo.

FOFOGA FETALAI: Ia, e taua foi le fautuaga a le sui usufono mamalu i lau Afioga i le sui usufono o lo o sausaunoa.

Tofa ALE VENA ALE: Faafetai. Ia, tasi lea tama o lea o le a sau i i. Lau Afioga i le Fofoga Fetalai, faafetai foi i si ou uso nei. Lea na musumusumu mai nei ia te au i fafo i o, Ale, ua ou fia faamavae i le tulaga lea ua i ai le tou mataupu.

Lau Afioga i le Tamaitai Minisita o Tupe ma lau Afioga i le Minisita o le ou le poloketi...

FOFOGA FETALAI: Ia, malie leaga o lea ua taua le suafa o le sui usufono mamalu mai Anoamaa 1.

Afioga Alaiasa Moefaauouo Malagaitutogiaia Sepulona Moananu: Lau Afioga, ioe, ou te faataua lava mea e aumai i totonu o le Maota leni, na o mea moni ma le faamaoni. E le o faamaonia lafoga a le Taitai o le Tutoatasi. A faapea foi o le... ia o tala lava o mea o tala foi ia o le faleoo ae oo mai loa i le faletele e gase e leai ni mea faapena na tutupu. Ia ma le agaga faaaloalo.

FOFOGA FETALAI: Malo faafetai lea ua manino lea vaega. Ia saunoa le Afioga i le sui usufono mamalu.

Tofa ALE VENA ALE: Ioe, ua iloa foi o mea ia o tala e fai i tua e avea ma tala moni.

Lau Afioga i le Fofoga Fetalai, e momoli atu le agaga faafetai. Faafetai foi i lau Afioga i le Fofoga Fetalai mo le avanoa. A o le tatou faigamalo ma le tulaga ua tulai mai ai le Tulafono leni, ia, faafetai tele lava mo le amanaia o tatou tagata, ia ma e matua lagolagoina e le itumalo o Faleata 4 le Tulafono ua i lumamea nei o le Maota. Soifua manuia le tatou Fonotaga i leni taeao.

FOFOGA FETALAI: Malo saunoa i le sui usufono mamalu, ma le fautuaga foi i le penisione mai ma le penisione matua. Ia malo lava mo fautuaga i le Minisita.

Ia, o lea ua matau atu ua... Ia, se i tulai mai le sui usufono mo Vaimauga 1.

Afioga SULAMANAIA FETAIAI TAUILILI TUIVASA (Vaimauga 1): Faafetai mo le avanoa i lau Afioga i le Fofoga Fetalai e fai ai foi se sao o leni itumalo i le matagofie foi o le Tulafono ua opea i le Maota. E muamua

ona avatu le agaga faafetai i lau Afioga i le Fofoga Fetalai ona o le faatauaina foi o lenei aso faapitoa mo le sauaina o tina ma tamaitai. Ua matau foi i lenei taeao i le aulelei mai o lenei talaga atoa pei ua ou toe vaai i tama tuai o le All Blacks, a o tamaitai pei ua ou vaai i teine netball a le Silver Ferns, i le matagofie ina ua faatauaina le aso faapitoa po o le sauaina o nai tina ma tamaitai. Pei o le agaga fiafia lenei ma le meemea, e amatamea lenei Maota i le faamamaluina o le ituvai lea o tina.

Ae ou te le i sau i lenei taeao sa ou matamata i luma o le laupapa o le matou fonofaavae ma le matou igoa la e i ai, o le toa moni e pulea lona loto, i laupapa foi ia a itumalo. Ota fiafia ai lava lea i le manaia o le mafai ona o atu si o matou itumalo ma matamata ai i le tulaga o le sauaina o tina ma tamaitai. Ona ou sau fiafia lava lea i lenei taeao, e tatalo atu ai foi i e o lo o faia nei mea, ae tatalo foi i le Minisita ia fai se laupapa mo e sauaina tina, o le palaai moni e fasi lona toalua. Aua o le tamaloa e palaai e fasi lona toalua.

Ae lau Afioga i le Fofoga Fetalai, o le Tulafono e lagolagoina, e faafetai atu ai i le Afioga i le Minisita o Tupe i le NPF ina ua tuuina mai. E tele lava nai finagalo foi o sui usufono pe a matamata i lenei Tulafono ia o lea e pei e aumai ai o le faamanuiaga mo i latou e le atoatoa le malosi. Ia pei o lea ua uma ona pasia foi le tulaga, e aua ne i toe faaogaina ia upu a o le aafiaga tumau o le tino ma le mafaufau. Ia pei o le mea lava lenei, o lea foi sa faaalia ai finagalo o nisi i Tulafono e aua ne i tatou... o mea ua pasia, o aafiaga tumau o le tino ma le mafaufau le Tulafono lenei. Ae faafetai ua afea le tulaga i nai tagata o lo o i ai manaoga po o aafiaga tumau o le tino aemaise o le mafaufau. E lagolagoina le Tulafono. A o nai tuualalo e pei o lea e aumai le Tulafono i fomai. E le o po foi se lilo pei ona saunoa foi nisi e i ai aafiaga tumau o le mafaufau. E tatau ona i ai tulaga mai afioaga lava ia taitasi, pei o lea foi sa avatu le tulaga i le fonofaavae, e mafai ona galulue faatasi ai le Matagaluega o Tina i pulenuu tamaitai ma alii ina ia aumai faamaoniga. O isi e le o o i se falemai, a o la e lava e silafia e itumalo ma afioaga i latou na o lo o i ai aafiaga e fananau mai lava se i tulou le Maota, e pei e papa vaa, e pei e faapena, ae mafai lava ona o fai feau, e galulue malosi. E tautino atu foi i lenei Maota, o lo o i ai nai tagata faapena e o lava agai atu i le fale o le faipule, o lo o tausia lava e le faipule i le taimi lenei, e pule lava latou a o lava toe omai. Pau lava le mea e alu i le faipule e resitala foi lea ina ia lavevea i totonu o le lola palota. Ae o lava e tafafao ma o i mea e agai i ai, e o lava leai ni mea e nonofo ai, omai, ia talia e le faipule, ae le o sau le faipule, aua e aumalolosi, ae i ai nai aafiaga o latou mafaufau.

O le agaga la o le sui usufono, pe le mafai ona lava se faamanuiaga mai pulenuu i tulaga foi faapena pei o lea na taua foi i nai faifeau, aemaise o faifeau e fai ma o atu, a o le pulenuu lava ma aiga, ina ia mafai ona aumai o le tama lea e ola mai lava e i ai ona manaoga na faapitoa, e le o o i le falemai. O le uiga lenei, ia aua nei... ae ia aumai lava i totonu o le pulega a alii ma

faipule ma fono faavae i itumalo e lagolago ai le tulaga ina ia mafai ona faamatuu mai.

Na taua e le fetalaiga foi e le Fetalaiga foi ia Ale le tulaga lea e tau avatu ai, o ni faamanuiaga mo e o lo o tausia nai tagata nei e aafia i le manaoga faapitoa, tino ma le mafaufau, aua e le o po se lilo, e le iloa po o le a le tulaga i le faatinoina o latou teugatupe. A faapea o lea e \$100 i le masina, ia, e tatalo atu ai i lau Afioga i le Minisita, pe \$150 ina ia sau lava le \$100 lea e faatino ai le tausiga, a o le tagata lea, aua e le mafai la ona sau le tagata lea e pipili pe tauaso e tu i le laina, pe o lea e sau lava le tagata lea e tausia po o se isi e faamaonia e sau e tu i le laina ma tala le tupe, ona alu sao lava lea o le \$100 i totonu o lana ia... e faatino ai, a o se tupe e tausii ai le...

Na saunoa foi nisi sui usufono i atunuu mamao o lo o faatino ni falemai ma tulaga faapena. Ae tatalo atu foi pe a i ai se tulaga i luma i nai tulaga foi o lea foi sa avatu se talosaga a lenei itumalo i nai o tatou tina ma tama matutua i faamanuiaga, a i ai se faleaiga... O Niu Sila sa ou alu atu ou matamata i totonu o Aukilani i mea e i ai si au fanau, sa ou matamata ai i le faleaiga lena e o uma ai lava tagata ia. E te vaai e ta loa le 12, na o le o atu lava aai. E pei e faapena. Le tou faigamalo pe i ai se faleaiga e tasi lava i le masina e omai i ai nai vale, omai uma i ai nai tagata ia e lavevea i aafiaga tumau o le tino. Pei e talosaga atu foi leaga o lea e le o i ai Fata Pinati, Sala, pe omai e aai fua ae ave i ai e si o tatou Malo ni tulaga i faamanuiaga ina ia faafiafia aua o nisi masalo e lelei loa le mea e taumafa ai te i lava ua tatou vaai atu ua toe alu ese le mai, toe alu ese le tulaga o lo o... aua o isi mai e le o mafai ona maua i le falemai, o mea o tina foi na e ua aafia mafaufau ua sola le tamaloa toe fai le isi ana, se i tulou, ia po ua maliu foi le tama ia aafia ai loa le mafaufau. Ia ae pei la e aumai e faafiafia i nai faleaiga ia ma faapena, e taitasi lava i le masina, ina ia maua ai se faamama-avega.

O le tulaga lau Afioga, po o le a le tulaga pe a te i ua valaau le Atua i le tagata lea pe le entitle i le \$5000 foi lena mai le NPF e faatino ai le maliu, aua ina ia mafai ona... o la e ua faalogologo mai le atunuu o lea ua afea e lena itu faafetai le tulaga i e e aafia le tino ma le mafaufau. Ae a maliu la le le atoatoa lea, ia pe le mafai ona aumai pei o le tulaga foi lea e aumai le \$5000 mai le NPF e entitle ai. E leai se popolega o le sui usufono po o fea e aumai ai le seleni, ae pau lava le mea o le tulaga ina ia mafai ona o lea foi e i ai le tulaga lea i le Komiti Faapitoa, pei o lea e matau i lau Afioga i le Minisita, o lo o galulue vaavaalua le Minisita o Tina ma Tamaitai, ia e toe popole foi i le Komiti Faapitoa, ia pe le ua lava a faamaumauga ia e aumai e fomai, ina ne i... e faapena se manatu, e aumai lava i lau Afioga i le Minisita ma le Matagaluega o Tina ma Tamaitai, avatu foi i le NPF ua faatino. Ae tau popole lava i nei mea o Komiti ia e tumu ai le mea, pei lava o le tuai ona o atu i tua o tupe o le tele o mea e alu i ai le... Ae o le tatalo lena i lau Afioga.

E lagolagoina le tulaga lea ua i ai e taitasi lava i le masina a ia mafai lava ona afea le tulaga o i ai. Ia pei o lau Afioga i le Fofoga Fetalai, pau lena o mea o lo o manatu i ai lenei itumalo. Ae le i nofo i lalo le sui usufono o le Vaimauga, ia, e avatu foi le faamaisega foi a lenei itumalo i le valaau paia a le Atua, i se tasi foi o tina po o le faletua ia Tausili o si o matou nuu o Laulii. Ia faamaise le agaga o le Atua i lau Afioga Leota aemaise o le nofo a alo ona o le valaau paia a le Atua i le afioga i le faletua. Agalelei le Atua i lau Afioga i le Fofoga Fetalai aemaise le paia o lenei Maota i le faaauauina o tiute ma auaunaga o lo o tatou galulue ai, ae avatu le lagolago a le Vaimauga 1 i le lagolagoina o le Tulafono ua opea nei i le Maota. Ma lou agaga faaaloalo. Faafetai i lau Afioga i le Fofoga Fetalai.

FOFOGA FETALAI: Malo saunoa i lau Afioga i le sui usufono mamalu, faafetai foi mo fautuaga taua aua le agai i luma o le tatou Tulafono Tau Faaofi.

E i ai se isi mataupu lau Afioga i le sui usufono o Anoamaa 1?

Afioga ALAIASA MOEFAAUOUO MALAGAITUTOGI SEPULONA MOANANU: E i ai foi le matou maliu la e i ai ae o le a ou le afea le tulaga lea lau Afioga o le a ou agai sao lava i le Tulafono e pei ona i ai.

E lagolagoina le tulaga o le Tulafono, o lea foi ua saunoa le Minisita o Faatoaga i le faamaitega o le mafuaaga o lenei Tulafono. Se ta te lagona lava le mea e lelei. Ia o le a le mea o le a ta tetee ai pe a faapea o se mea e aoga i lou itumalo? E tele tagata la e i ai i tua i le itumalo e aafia i tulaga ia, a o lea o le a maua nai a latou faamanuiaga. Faafetai ma tatou viia le Atua i le tofa ua ae e fai ai nei fuafuaga e le tatou Malo. Ae o tulaga ia o lea ou te vaai i le Tulafono, e tele Tulafono Faatonutonu lea o le a agai e faamanino ai le tele o tatou vaega ia. E i ai le isi vaitaimi na ou aafia ai a o fai foi le palota a le isi aualii o le matou aiga, ia o atu loa le isi auvaega ave le tauaso e fai le ID, a o le tauaso o le tauaso o le matou aiga. Ia ona alu lava lea aua faapea o le tagata o la e gasegase. Ia ae sau i fafo o le fale palota fai mai ou te palota i... ae alu atu i totonu fai i le leoleo, o au ou te palota i le matou toeaina lea e alu i le... Vaai tatou i te i ua faapea e faasese e tatou isi tagata, ae le iloa o la e faasese mai tatou e tama ia i le agai i luma foi lea i le tulaga... o la e lelei le mafaufau. Ia, a o tulaga o lea e manaia le... pau lava le atugaluga ia te au lau Afioga, tulou, o le profession lenei o le fomai e taua tele, ae ua ta vaai foi i le mea lea na ave ai nei tatou tagata faigaluega foi nei e o i tulaga faavaitaimi, ia e aumai lava lipoti a fomai. Ae le umi ae maua mai e le i leva ona faigaluega ae ua aafia i tulaga o mai, tulaga faapena. O lona uiga, e taua le aumai o tagata e i ai i totonu lipoti, ina ne i te i foi ua faaogasese e isi tagata le Tulafono lenei, a o la e lava e silafia ma malolosi, aua e tele le faalagolagomaga o le resitala i le lipoti a le fomai. Aua pe a lou 60 tausaga ae e aafia loa, na o le lipoti lava a le fomai e te ulu ai i totonu o le resitala.

O le mea foi lea e taua tele le... aua e i ai foi isi tulaga o lipoti ua faapitoa lava e le Malo na o le taitoalua taitoatolu, a o isi fomai ua le oo i ai le tulaga lea o faamanuiaga o latou lipoti.

Ae lau Afioga, o le taua o nei Tulafono, pei foi o le tatou Tulafono lea o le ID lea na uma atu, e taua lava le malamalama o le sui usufono ina ia alu atu, e oo atu le tulaga o le galuega foi lea e ave i tua, a ua uma ona fai le galuega a le sui usufono e faamalamalama i lona itumalo tulaga o lo o i ai i totonu o le tatou... e pei foi la o lenei Tulafono, ia o le a fesoasoani foi i le matou itumalo e faamalamalama i ai le tulaga e oo i ai ma aafia ai i nei tulaga o le aafiaga tumau po o le disability fund e pei ona tatou... ae faafetai tele mo le Tulafono. Tatou alo i luma e faatino aua se manuia o tatou tagata. Ma le agaga faaaloalo.

FOFOGA FETALAI: Malo saunoa. Faafetai mo le saunoaga. Ia e taua foi le saunoaga a le sui usufono mamalu na taua ai le tatou faasilasilaga o maliu. E le o i ai i totonu o tatou Tulafono Tumau. Ae o le avanoa lava ia o lea e tuu atu ona o le tatou va fealoaloai. O le mea lea, ia e leai o lo o maua lava le avanoa leaga e taua foi le faafogafoga mai, aemaise lava o taimi o mafatiaga faapenei o tatou itumalo lea e maua ai le avanoa. Ae le o i ai se faatagaga i totonu o tatou Tulafono Tumau mo le silafia e le mamalu o le tatou Palemene.

Ia se i tulai mai le sui usufono o Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEI'A (Falelatai ma Samatau): Lau Afioga i le Fofoga Fetalai, e tulai atu foi e fai se sao o lenei itumalo i le Tulafono Tau Faaofi taua pei ona i luma o le tatou Palemene. E muamua ona momoli atu le faafetai tele i le Afioga i le Minisita ma le Matagaluega e ana le Tulafono Tau Faaofi. Faafetai o lea ua aumai i luma o le tatou Palemene, e pei foi ona maua i nisi o saunoaga, e ui o lea ua uma ona faatino ma amata a o le mea taua o lea ua aumai i luma o le tatou Palemene. E pei o vaega taua ia a faavavevave ai se mea e penefiti ai le atunuu, e manatu e le afaina tele le vaega lea.

E lagolagoina e lenei itumalo le Tulafono Tau Faaofi. Pau lava le tuualalo lea e tau avatu, pei lava e le lava le \$100. Ae a pe a tuutuu i luga i le \$300 faatutusa ma le penisione a tagata matutua. O lea foi mo le faasaoga a nai lea sa taua e nisi o sui usufono e \$2 miliona lea e faagasolo i le tausaga faaletupe lenei e uma i le faaiuga o le masina nei, a o lea e tilotilo atu e le \$2 miliona e \$2.5 miliona. Ia, ae manatu se i oo atu i lea vaiaso e talanoa le Tala o le Tupe, ona o lea e maitau atu ua faaitiitia i le \$2 miliona ae sa faapea ai a siisii i luga le Tala Faaletupe i le tausaga 2023/2024.

Ua matauina foi e lenei itumalo ua faatupulaia i latou e feoai solo i le taulaga ma aisi solo i le mamalu o le atunuu. O nisi foi tagata ua ave ma faafitauli, ua oo i le tulaga lea ua le mafaufau. O lea foi e maua i nisi o

saunoaga, ia e aisi i le taeao ae o oi le afiafi ua ona. E pei o nai vaega ia o lea e vaavaai i ai ma le agaga faanoanoa, ae o lo o faatupulaia pea.

E i ai le manatu o lenei itumalo, e talafeagai le penisione lea mo i latou e aafia o latou physical abilities, aua o la e mafai ona nonofo lelei i aiga ma avatu la le seleni lea e fesoaoani e tausi ai. A o latou ia e aafia i le aafiaga tumau o le mafaufau, e ese le faigata ona ave i ai le seleni lea, aua e tatau ona fai lelei se nofoaga faapitoa e ave i ai i latou ia ua faaletonu o latou mafaufau e tausi lelei ai ma vaai lelei ai, e pei foi ona molimauina i nisi o atunuu. Aua e tatau ona oo i le taimi e implement ai le tatou Tulafono lea, e le tatau ona toe vaaia nisi o tagata nei o lo o nofonofo solo i le taulaga, aemaise lava faleaiga lea e matauina e le mamalu o le atunuu, e fai ma faalavelave i tagata ma le mamalu o le atunuu o lo o feafioai e fai a latou faatau ma agai atu foi i faleaiga. A o le vaavaai lena a lenei itumalo, maumau pe a na faapea e fai se nofoaga faapitoa e mafai ona ave i ai i latou nei ua aafia o latou mafaufau e tausi lelei ai ma fai ai foi togafitiga e mafai ona tuuitiitia ai le aafia o latou mafaufau, ia ma le aafia ai foi o tagata lautele.

E pei o le vaavaai lena a lenei itumalo, ae lagolagoina, lagolagoina e lenei itumalo le Tulafono e pei ona tulai mai. E momoli atu ai le agaga faafetai foi i le Afioga i le Minisita ma le faigamalo ona ua mafai ona amanaia nai tagata o lo o aafia i aafiaga tumau. E pei o se fesoasoani lea i le tatou Tulafono. Ma le agaga faaaloalo.

FOFOGA FETALAI: Malo faafetai mo le sao foi o Falelatai ma Samatau aua le fatufatuina o le tatou Tulafono Tau Faaofi.

Ia se i tulai mai le sui usufono mo Faleata 1 lau Afioga i le Minisita Lagolago.

Tofa MANULELEUA PALETASALA T. TOVALE (Faleata 1): Faafetai i lau Afioga i le Fofoga Fetalai mo le avanoa e avatu ai foi se manatu o lenei itumalo o Faleata 1. A o le mea sili faafetai i le alofa o le Atua i Lona agalelei e le o aafia lenei itumalo i le malaga a le maliu ma le oti. O le mea sili faafetai i Lona alofa ma Lona agalelei o lo o malupuipuia pea le itumalo.

A o lenei taeao e fia avatu foi se leo leaga e matauina foi e lenei sui usufono, masalo foi e le o po se lilo i le silafia e le mamalu o le atunuu aemaise o sui usufono mamalu o le Maota, leaga o le matou itumalo lea e i ai se tasi o tamaitai lea e i ai le tulaga lea o le faasoesa i luga o le aualatele i le tele o taeao ma afiafi ma taimi o le aso, o le galuega lea o le faalavelave i taavale ia. Ma o le mea moni lava ia, atonu o le Tulafono lea e matua lagolagoina lava, atonu o le a tuu ai le mea lea o lo o faia e le tamaitai lea, semeamanu o lea o le a maua se tupe e fesoasoani ai mo ia i le tulaga o meataumafa. O le mea lea e momoli ai le agaga faafetai. O le mea sili foi o lea e faafofoga mai le Afioga i le Minisita o Leoleo, ia sa talosaga lava i ai foi lea i ai ina ia fai se fua i lea foi tamaitai ona o lea e tele ina taua e nisi o sui usufono mamalu

o le Palemene. Ia, ma le isi o lea o lo o i ai le nofoaga faapitoa lea o lo o ave i ai tagata nei la e i uta i o i Moamoa. O i ina lea e masani ona ave i ai le tamaitai lea, a o lona lave, e fai ma sola mai tua. E sola mai la i tua, ua faigata foi la i le Matagaluega ma le nofoaga lea i le tele o taimi e omai tau sue ma tau pue atu ma toe ave i o i le nofoaga lea.

O le mea foi la lea e faamalulu atu ai i le paia o le atunuu o Samoa aemaise o le tatou atunuu ona o le tulaga lea pei ona i ai le tamaitai lea. A o le tulaga ia o le Tulafono e pei ona talanoaina i lenei taeao, e matuai lagolagoina lava e lenei itumalo ma lenei sui usufono. Ia pei o se faamatalaga lea i lenei taeao e avatu ai foi se lagona o lenei sui usufono. Faafetai i lau Afioga.

FOFOGA FETALAI: Malo faafetai, malo mo le faasoa. Oi, ia se i tulai mai le sui usufono o Safata 1 lau Afioga i le sui usufono mamalu.

Afioga LEAANA RONNIE POSINI (Safata 1): Lau Afioga i le Fofoga Fetalai, e faaalua foi so matou foi manatu o lenei itumalo e tusa ai ma le Tulafono. E momoli le agaga faafetai tele i le Minisita e a ia le Tulafono. E talitonu lava e leai se tasi o i totonu foi o lenei Maota e le lagolago i le Tulafono ua faatulai mai. Ae i ai lava nai fautuaga ma nai tuualalo e ala i le tatou Tulafono. O lea sa faitau foi lava i le tatou Tala o le Tupe, o le tatou Tala o le Tupe lea e faagasolo nei, e \$2.5 miliona lea na faaoga i le fesoasoani lea, a o lea ua matau i le Tala o le Tupe, o lea ua palasi i lalo i le \$2 miliona. A o le naunautaiga lau Afioga i le Fofoga Fetalai, e pei o lea ua taua e \$100 e totogi ai nai faamanuiaga o e ua aafia i le mafaufau ma le tino. Ou te talitonu lava au ia pei ona taua e nisi sui usufono, ae a pe a tuu i luga, tuu i luga i le \$200 leaga o lau matau ma le tatou faitau, o nai tagata ia o lo o i ai aafia tumau nei, e taugata ia o le latou tausiga ma tulaga faapena. E i ai la le talitonuga, ia tuu i luga i le \$200, faatutusa lava ma le tulaga o penisione a nai o tatou tagata matutua. E oo foi i le tulaga lea o e aafia i le mafaufau, e tau fesili foi i le mafaufau pe tatau ona fai ni a latou faamanuiaga, ona o e fitoitonu i ai ma ave i ai pei ona taua e nisi sui usufono ona ave i ai le seleni lea. A o le mea mautinoa i le Paeaiga lea talu ai, o matou sa i le Komiti lea o le Va Fealoai sa i lalo le Matagaluega o le Falemai, o la e i ai le tatou fale, e tele le fale la na fausia e le tatou Malo, fale faapitoa mo e aafia mafaufau. O le fale na matou asia, o le matua lelei lava o le fale la e i Motootua. A o le faafitauli sa feagai ai, o le faigata ia ona vaavaai, tele ia o mea ua faaleaga ma tulaga. A o le fale la e i ai, o le matua lelei lava ma mautu atoa le fale la e i ai, sa alu ai le matou asiasiga i le Paeaiga lea talu ai. E i ai la lou talitonuga, afai e le ave faamanuiaga i tupe nei e ave i tagata taitoatasi e aafia o latou mafaufau, matua ave atoa i ai tupe i totonu e fau ai se nofoaga e toe faaopopo le nofoaga la e i Motootua ona ave lea i ai o tatou tagata ia. Aua o le mea moni lava, e tau fesiligia po o ai e ave i ai le tupe lea i tagata

nei e aafia mafaufau ona avatu lava lea faaaoga e isi tagata, ae le alu tonu lava i tagata o lo o aafia o latou mafaufau.

Ia, o se fesoasoani atu lea i le Tulafono ma le agaga faaaloalo.

FOFOGA FETALAI: Malo faafetai mo le fesoasoani mo le tatou Tulafono Tau Faaofi.

Ia, o lea ua matau atu e pei ua maea saunoaga a sui usufono mamalu aua le tatou Tulafono Tau Faaofi. Ae ua i ai foi le manatu, leaga o lea foi ua tatou lalata i le tatou taimi manava.

O le mea lea o le a taatia atu ia i le aso a taeao o le a fotuai ai le saunoaga faamalamalama a lau Afioga i le Tamaitai Minisita aua foi nisi o itu taua e pei ona lagalaga e sui usufono mamalu.

Ia, e momoli atu pea le agaga faafetai o le Fofoga Fetalai i le paia o le Palemene. Faamalo lava tapena e ala i a outou saunoaga, a o ni timaiga foi ma fautuaga e saga faaleleia ai tatou Tulafono Tau Faaofi. Faamalo le onosai ma le faapalepale, faamalo foi le usufono. O lea ua tatou i ai i le faaiuga o galuega o lenei aso, ia foi pea le viiga i le Atua i Lona agalelei.

E momoli atu foi le faafetai faapitoa a le Fofoga Fetalai i lo outou mamalu, o Taitai o le atunuu e tusa ai foi o lo outou logosaia foi po o le taliaina o se faatalauula a le Fofoga Fetalai aua outou laei mo lenei aso ona o le faatauaina o le tatou faamamaluina aua lava le tetee atu i le sauaina o tina ma tamaitai. O le mea lea faafetai tele lava i le paia o le tatou Palemene. Ua i ai foi ma le talosaga a le Fofoga Fetalai, a o agai pea tatou tualumaga o le tatou Palemene i le isi foi aso Tofi o lumanai atu, ia o le tatalo foi lena a le Fofoga Fetalai. Ia a o le feau foi mo i latou o lo o faia pea nei amioga, o lea ua outou silasila mai ua tausolomua Taitai o le atunuu ia outou silafia le faatauaina ma le teena o uiga faapenei ma tu ma aga.

O le mea lea, afai o outou o lo o tumau pea i sauaga faapenei i tina ma tamaitai, ia ua tatau ona taofi nei, aua ne i toe faia. Faamalo atu foi i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, o lo outou mamalu lava o lo o tua atu i ai le Palemene ma le Malo, malo le tautua atunuu.

Faafetai Samoa i lau tapuaiga, o lea ua iu manuia le fonotaga a lau Palemene i lenei aso, malo tapuai, faafetai tatalo.

E fia faafetaia foi auunaga uma o lo o galulue mo le lagolagoina o tatou fonotaga, Matagaluega o Leoleo, Falepuipui ma Toefuataiga, Matagaluega o Fesootaiga ma Faamatalaga Tekonolosi, le 2AP, le Pulega o Auunaga Tau Tinei Mu ma Faalavelave Tutupu Faafuasei ma le kamupani a le Cooline, faamalo faafetai. Faafetai tautua faaauau mo le tatou Palemene.

Ae tatou te le i tolopo, ou te talosaga atu i lau Afioga i le Tiakono Toeaina o le sui usufono mo le Vaa o Fonoti se i e saunia se tatou tatalo e faaiu ai le tatou Fono.

Na tolopo Taulumaga a le Fono Aoaio Faitulafono i le itula e 1:02 i le afiafi seia aulia le Aso Faraile, 16 o Iuni 2023 i le itula e 9:30 i le taeao.